

31 ME 2022

ASO LUA, 31 ME 2022

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoao Faitulafono.

MALELEGA MAI LE AO O LE MALO

TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu ai nei le Maliega i le Fono Aoao Faitulafono na te iloiloaina ai le Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe Faaopopo (Nu.2) 2021/2022.
2. Tulafono Tau Faaofi o le Faatatauina o Tupe 2022/2023.

TUUINA ATU i lou nei Lima i lenei aso 30 o Me 2022.

Sainia: Tuimalealiifano Vaaletoa Sualauvi II.
O LE AO O LE MALO

31 ME 2022

ISI FAASILASILAGA A LE FOFOGA FETALAI

Mo le silafia e le mamalu o le Palemene, o le Aso Lua, 17 Me 2022, na ou lipotiina mai ai le Faitioga Tusitusia a se tasi o Sui Mamalu e faatatau i le lagaina o se mataupu tau tulaga aloaia e tusa ai ma Tulafono Tumau 178(1). Mo le silafia e le Palemene, o lenei mataupu na tauala mai i le Sui Usufono mo le Itumalo Palota o Faleata 3, le Tofa ia LEALAILLEPULE Rimoni Aiafi e faasaga i le Sui Usufono mo le Itumalo Palota o Gagaemauga 1, le Afioga i le Sui Palemia, Afioga Hon TUALA Tevaga Iosefo Ponifasio.

O le Aso Lua, 24 Me 2022, na ou taulimaina ai le Tali Tusitusia a le Sui Mamalu o lo o faasaga i ai le Faitioga mo le iloiloga a le Fofoga Fetalai mo sana Faaiuga i lenei lava mataupu.

I le usitaia o aiaiga o Tulafono Tumau 178(2), na iloilo e le Fofoga Fetalai le tulaga o lenei mataupu mo sana Faaiuga pe ua fesiligia ai Tulaga Aloaia o le Palemene.

O lea ou te lipoti atu ai i le Fono Aoao e faapea, i le maea iloiloaina o lenei mataupu, ua taunuu atu ai i le Faaiuga e faapea, “E lē o aafia Tulaga Aloaia o le Palemene i lenei mataupu. O lea ua tapena le Tali Tusitusia e tuuina atu i le na faatoai mai lenei faitioga, faatasi ai ma le na faasaga i ai le faitioga, ma o le a leai foi se isi laasaga mo lenei lava mataupu.

Ua tatou i ai i le uluai masina o lenei tausaga faa-Palemene...

Tofa Hon Laufo Fonotoe Nuafesili Pierre Laufo (Anoamaa 2): Lau Afioga i le Fofoga Fetalai, ma le faaaloalo lava, leaga o lea ua matau atu ua e see ese ma si mataupu lea. E fia fesili i luga o le Tulafono Tumau i le Faaiuga pei ona e saunoa i ai e tusa ai foi ma se faasea a se tasi o sui usufono ua le o toe i ai i totonu o le Maota. E pei o le mafuaaga lena o lou tulai atu.

O lea ua e saunoa ua saunia se Tali Tusitusia a lau Afioga. O le faafesili lava ma le faaaloalo lava, pe o le a tufaina mai i se taimi pe faailoa mai lou finagalo mo le silafia e sui usufono mamalu o le Maota.

Ia ma le lua lau Afioga po o lau faaiuga lea e faavae mai luga o le Tulafono Tumau 181. Ma le agaga faaaloalo lava. Faafetai lava.

FOFOGA FETALAI: Ia, talu ai o lea ua tulai mai le Sui Taitai o le Itu Agai ma faailoa mai lona finagalo, ia o itu uma lava pei ona e saunoa i ai, e le i i ai lava se tulimanu e le i oo i ai le saililiga a le Fofoga Fetalai. E oo foi i a tatou Tulafono Tumau, ia o i ina e faavae ai le faaiuga.

31 ME 2022

Isi Faasilasilaga a le Fofoga Fetalai

A o le tulaga e pei ona i ai le faafesili mo kopi, ia, o lea ua tuuina atu kopi o le faaiuga i le ana le tagi, ia faapea foi ma le o lo o faasino i ai. Ae atonu e i ai foi se taimi, ia o le a silasila foi i ai le Maota.

Atonu e taua foi le faatu mai o lou finagalo e taua foi mo le silafia e le Maota ina ia malamalama atili ai mo lenei mataupu.

Ia, ua tatou i ai i le masina o lenei tausaga faa-Palemene, le uluai masina o Me, faagasolo atu ia Aperila o le tausaga fou. E tatou te faafetaia ai lava le Atua i Lana leoleoga ma Lana puipuiga alofa i le soifua mamalu o le Palemene.

I lenei foi taeao, o lea ua tepa i ula ma ou tagai i matagofie, ua le o le taeao nai vaipao ma le fagalafitai, ae ua tatou toe fesilafai i le manuia o le Atua. Ia foi pea ia le Viiga ma le faamanu ia te Ia. O Lona aao faaola ua mafai ai ona maleifua mai i le manuia le paia o le Palemene. I le afio o lau Afioga i le Taitai o le Malo, lau Afioga i le Tamaitai Palemia, afio foi lau Afioga i le Sui Palemia, afifio a outou Afioga i Minisita o le Kapeneta, faapea foi a outou Afioga i Minisita Lagolago.

Afio lau Afioga i le Sui Taitai o le Itu Agai, aemaise le mamalu o sui usufono o le Palemene. Ou te ofo alofa ma faatalofa atu i lenei taeao, i le soifua manuia ma lo outou lagi e mama.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a lo tatou Malo ua faatasi mai mo tatou tualumaga i lenei taeao. Malo le soifua manuia.

Le faafofoga tapuai mai a le atunuu i ona tafa e fia, i lau Afioga i Le Ao Mamalu o le Malo ma lau Masiofo, lau Afioga i le Sui o le Fono a Sui Tofia ma lou faletua, le Faamasino Sili ma le mamalu o le Faamasinoga, Faauluuluga o Ekalesia Kerisiano uma i le atunuu, ma le aufaigaluega tofofi o le talalelei.

Le paia i Aiga ma Tama, Tama ma Aiga, le usoga a Tumua ma Pule, Itua ma Alataua, Aiga i le Tai ma le Vaa o Fonoti. E faatalofa atu lau Palemene i lenei taeao i lo outou soifua manuia ma le lagi e mama.

Le alofaiva o le Maota i lenei taeao, ia i ai le agalelei o le Alii, ia faaauppegaina pea mai le lagi la outou tofa aua le lufilufiina o le manuia mo Samoa. Manuia le usugafono a lau Afioga i le Tamaitai Palemia, le Saofaiga a le Kapeneta, manuia foi le usugafono a sui usufono mamalu uma o le Maota. Manuia le tapuai mai a lo tatou atunuu.

31 ME 2022

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5):

1. P.P.2022/2023 Nu.10, Lipoti a le Komiti o Tupe Maua ma Tupe Totogi i le P.P.2020/2021 Nu.109 ma le P.P.2021/2022 Nu.38, Lipoti Faaletausaga a le Matagaluega o Faalapotopotoga a le Malo mo Tausaga Faaletupe 2019/2020 & 2020/2021.
2. P.P.2022/2023 Nu.11, Lipoti a le Komiti o Tupe Maua ma Tupe Totogi i le P.P.2020/2021 Nu.106 ma le P.P.2020/2021 Nu.24, Lipoti Faaletausaga a le Faletupe Tutotonu o Samoa mo Tausaga Faaletupe 2019/2020 & 2020/2021.
3. P.P.2022/2023 Nu.12, Lipoti a le Komiti o Tupe Maua ma Tupe Totogi i le P.P.2021/2022 Nu.17, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe 2020/2021.
4. P.P.2022/2023 Nu.13, Lipoti a le Komiti o Tupe Maua ma Tupe Totogi i le P.P.2020/2021 Nu.68, Lipoti Faaletausaga a le Faaputugatupe mo le Lumanai Manuia o Tagata Samoa mo le Tausaga Faaletupe 2019/2020.
5. P.P.2022/2023 Nu.14, Lipoti a le Komiti o Tupe Maua ma Tupe Totogi i le P.P.2020/2021 Nu.78 ma le P.P.2021/2022 Nu.33, Lipoti o Faamatalaga ma Tala o Tupe a le Faaputuga Tupe o Faamanuiaga o Tagatanuu Matutua o Samoa mo Tausaga Faaletupe 2019/2020 & 2020/2021.

Ma le faaaloalo lau Afioga.

LAFO A TAITAIFONO O KOMITI FAA-PALEMENE

Afioga NIUAVA ETI L. MALOLO (Taitaifono o le Komiti o Vaega tau le Tamaoiga): Lau Afioga i le Fofoga Fetalai, e talu ai e le i maea lelei iloiloga a lenei Komiti i le Tulafono Tau Faaofi o Teuteuga o le Tulafono o Lafoga o Tupe Maua 2021, ou te tulai ma le faaaloalo e faatu le lafo, *Ina ia tusa ai ma aiaiga o Tulafono Tumau 166(1), e talosagaina ai e lenei Komiti se faatagaga a le Fono Aoao Faitulafono mo se taimi faaopoopo e faaauau ai ana iloiloga, ma toe lipoti mai ai i le Fono Aoao i se fonotaga o lumanai.*

Faaluaaina e le sui usufono mo Salega 1.

31 ME 2022

**Tulafono Tau Faaofi o le Faatatauina o Tupe Faaopoopo (Nu.2)
2021/2022 – faitauga muamua**

Na faamaonia le lafo.

**TULAFONO TAU FAAOFI O LE FAATATAUINA O TUPE
FAAOPOOPO (NU.2) 2021/2022 – faitauga muamua**

FOFOGA FETALAI: Tulai mai lau Afioga i le Minisita o Tupe.

Afioga Hon MULIPOLA ANAROSA ALE MOLIOO (Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.2) 2021/2022 i lona faitauga muamua.*

Faaluaina e le Minisita mo Faatoaga ma Faiga Faiva ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi o le Faatatauina o Tupe Faaopoopo (Nu.2) 2021/2022 i lona faitauga muamua.

**TALA FAATATAU O TUPE FAAOPOOPO (NU.2) 2021/2022
– faataatia i luga o le Laulau-a-Fono**

Na faataatia i luga o le Laulau-a-Fono e le Minisita o Tupe, Afioga Hon Mulipola Anarosa Ale Molioo le Tala Faatatau o Tupe Faaopoopo (Nu.2) 2021/2022.

**TULAFONO TAU FAAOFI O LE FAATATAUINA O TUPE
FAAOPOOPO (NU.2) 2021/2022 – lafo mo le faitauga faalua**

FOFOGA FETALAI: Ou te tapa lau Afioga i le Minisita o Tupe.

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.2) 2021/2022 i lona faitauga faalua ma o le Faamatalaga o Tupe Faaopoopo o le a aofia i le Lauga o le Tala Autu o le Tupe 2022/2023.*

31 ME 2022

**Tulafono Tau Faaofi o le Faatatauina o Tupe 2022/2023
– faitauga muamua**

Faaluaina e le Minisita mo Faatoaga ma Faiga Faiva ma le Minisita mo le Soifua Maloloina.

FOFOGA FETALAI: E tusa ai ma le Tulafono Tumau 133, o le a tolopo felafolafoaiga i le Tulafono Tau Faaofi o le Faatatauina o Tupe Faaopoopo (Nu.2) 2021/2022 e le itiiti ifo i le 14 aso a o tuuina atu le Tala Faatatau o Tupe Faaopoopo (Nu.2) 2021/2022 mo le iloiloga a le Komiti o Tupe Maua ma Tupe Totogi ma toe lipoti mai i le Fono Aoa.

**TULAFONO TAU FAAOFI O LE FAATATAUINA O TUPE
2022/2023 – faitauga muamua**

FOFOGA FETALAI: Tulai mai lau Afioga i le Minisita o Tupe.

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2022/2023 i lona faitauga muamua.*

Faaluaina e le Minisita mo Faatoaga ma Faiga Faiva ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi o le Faatatauina o Tupe 2022/2023 i lona faitauga muamua.

**TALA FAATATAU AUTU O TUPE 2022/2023
– faataatia i luga o le Laulau-a-Fono**

FOFOGA FETALAI: Tulai mai lau Afioga i le Minisita o Tupe.

Na faataatia i luga o le Laulau-a-Fono e le Minisita o Tupe, Afioga Hon Mulipola Anarosa Ale Moliio le Tala Faatatau Autu o Tupe 2022/2023.

31 ME 2022

**TULAFONO TAU FAAOFI O LE FAATATAUINA O TUPE
2022/2023 – lafo mo le faitauga faalua**

FOFOGA FETALAI: Tulai mai lau Afioga i le Minisita o Tupe.

Afioga Hon MULIPOLA ANAROSA ALE MOLIOO: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2022/2023 i lona faitauga faalua.*

Faaluaaina e le Minisita mo Faatoaga ma Faiga Faiva ma le Minisita mo le Soifua Maloloina.

FOFOGA FETALAI: Tulai mai lau Afioga i le Minisita o Tupe mo lau Saunoaga i le Tala Faatatau Autu o Tupe 2022/2023.

SAUNOAGA I LE TALA FAATATAU AUTU O TUPE 2022/2023

Lau Afioga i le Fofoga Fetalai,

Ua ou tulai atu i le ava ma le faaaloalo ou te faataatia ai i luma o le Laulau-a-Fono a le Palemene o Samoa aemaise o le faafofoga mai a si o tatou atunuu i tafa e fia o Samoa ma le lalolagi atoa, le Tala o le Tupe 2022/2023 ua maea tapenaina e le Matagaluega o Tupe aemaise le lauliliuina e le Afioga i le Taitai o le Malo ma le Kapeneta ma au nei o le Minisita o Tupe ina ia faataatia i luma o le Laulau-a-Fono ma le Palemene o Samoa aua le faafofoga mai mo le silafia ma le manino, aemaise ai lona pasiaina o itutino uma o lenei Tala o le Tupe ua maea tapenaina e le Matagaluega.

Ae o le viiga ma le faafetai e faafoi pea i le Atua Soifua ona o Lona alofa ma Lona agalelei ma Lona aao laveai faaauauina pea mo Samoa, ua tatou maua ai pea le tamaoaiga o lo o tatou sapi ai i le fale o Punaoa i nei tausaga e tele. O le lauliliuina o le Tala o le Tupe 2022/2023, ua taoto faatasi ma le molimauina o le faamanatuina o le 60 tausaga talu ona tutoatasi lo tatou Malo sa fauao ma faupo e o tatou matua. O galuega sa fitaituga i ai ma asaasaina le tauamataina o le tatou atunuu i fita ma puapuaga, peitai, o le a le faagaloina lo latou sao taua sa asaina ai le gasu o le taeao mai le amataga e oo mai i le taeao lenei. O le a le faagaloina le latou maa na lafo ma le latou aso na velo aua le tamaoaiga o le atunuu. O latou faiva ua laulausasa, o lea ua tatou aeae ai i Faleseu ma sao ai i maaomalie i lenei vaitau ma le faasoloina o le tapenaga o le tamaoaiga o le atunuu.

31 ME 2022

Saunoaga i le Tala Faatatau Autu o Tupe 2022/2023

Ae o le faamanatu masani mo i tatou uma le Palemene o Samoa, lau Afioga i le Fofoga Fetalai, lau Afioga i le Taitai o le Malo, sui usufono mamalu uma o le Palemene, tainane le faafofoga tapuai mai o Samoa i Samoa nei ma atunuu mamao. Ia tatou talitonu pea i lo tatou valaauina aua le atiaieina o le tatou atunuu, aua e le sili le ipuomea i lima na ia faia, o le aao laveai ma le aao alofa lea o le Atua o lo o tatou molimauina pea i Lana foai e ala i lenei Tala o le Tupe.

O le mau faavae o Samoa, o le fale o Samoa, o le fale e fautele. O le tamaoiga o Samoa, o le tamaoiga e fautele. O le manuia o Samoa, e faalagolago i se galuega lelei sa fautele. E manatu, e faapena le tagi talatala a le tamaitai i le fale na fau i Amoa ina ia lauiula ae poupou i toa. E faapena le tapenaga a le tatou Malo i le Tala o le Tupe lenei ina ia tapena ma le atoatoa, lufilufilimalelei e faaso ma talafeagai ai ma faasopolia uma lo tatou atunuu.

E ui ina tatou feagai ma fita ma faigata o le faamai, ma faafitauli eseeese, ae viia pea Lona alofa tunoa, o lo o Ia tapenaina pea mamoe e tele e osi ai le taulaga mo lo tatou atunuu. Ia tumau atu pea ia te Ia Lona viiga, e oo i le faavavau.

Lau Afioga i le Fofoga Fetalai, faafetai mo lo'u avanoa.

E talitonu o lea ua talii le sa o le tautai matapalapala, ma ua fana foi le u i le vateatea i Talosaga molia e lau Afioga i le Fofoga Fetalai, ua tomua ai la tatou fonotaga i lenei taeao toto'a.

Ae ou te faatalofa ma ofo alofa atu i le paia faatafafa o le Maota, i le afio o lau Afioga i le Fofoga o le Fono, afio le Taitai o le Maota lau Afioga i le Tamaitai Palemia, afio Afioga i Minisita o le Kapeneta ma Minisita Lagolago.

E faatalofa atu foi i lenei Itua o le Maota i lau Afioga i le Sui Taitai o le Itua Agai, ma le mamalu o sui usufono o le Palemene o Samoa.

Ou te faatalofa atu i le tapuaiga i Le Ao Mamalu o lo tatou Malo ma lau Masiofo, afio lau Afioga i le Sui o le Fono a Sui Tofia ma lou faletua, faapea foi le Afioga i le Faamasino Sili ma le Vaega o Faamasinoga.

E le galo foi le nofo tatalo mai a le afaigaluega faauuina a le Atua i fatafaitaulaga e fia, o lo o nono manu aua se manuia o Samoa.

E le vavae le falaooto i le paia maualuga i le faafofoga mai a le Usoga ia Tumua ma Pule, Itua ma Alataua, Aiga i le Tai ma le Vaa o Fonoti. E manatua pea o tatou uso a tuaoi i Sasae. Le paia ia Sua ma le Vaifanua, Fofa ma Aitulagi, Saole ma Saleaamua, Itua ma Alataua faapea le Launiu Saelua, o Faatui o le Motu faapea Tootoo o le Faleula.

31 ME 2022

Saunoaga i le Tala Faatatau Autu o Tupe 2022/2023

Avea foi lenei avanoa e faatalofa atu ai i Ofisa Sili o Pulega o Matagaluega ma Faalapotopotoga Tumaoti a lo tatou Malo, ua mafai ona tatou faatasi ai i le aso. Faamalo le tauatai, faamalo le onosai.

1. FAAVAE O LE TALA O LE TUPE 2022/2023

Lau Afioga i le Fofoga Fetalai,

E tusa ai ma le Tulafono Tumau 131, e ia te au le ava tele e fai ai ma sui o le Malo, ou te tuuina atu ai i luma o le Laulau-a-Fono a le Palemene le Tala Faatatau Autu o le Tupe 2022/2023.

O lenei Tala Faatatau Autu o le Tupe, sa tuufaatasia i se vaaiga taulai mo se tamaoaiga e siisii malie lona faatupulaia. O lo o faalupeina ma faaautuina e faapea: *“Folau faatasi, e faamaite le faatupulaia o le tamaoaiga ina ia mausali, mo le manuia o Samoa.”*

Lau Afioga i le Fofoga Fetalai,

E le o toe po se lilo i le luitau o feagai nei ma tamaoaiga o atunuu uma o le lalolagi ona o aafiaga o le KOVITI-19, aemaise ai foi ma le taua i le va o Ukraine ma Lusia, lea ua matua siitia maua ai le tau o le suauu, faapea oloa uma o lo o tuuina mai i totonu o Samoa. Ua tatou molimauina foi le ogaoga o aafiaga o nei luitau i atunuu uma o le Pasefika, ma e le sala ese mai ai Samoa. Ona o nei tulaga, o lo o fuafua e ono faaitiitia le tamaoaiga o Samoa i le 3% mo le tausaga faaletupe o lo o faagasolo nei 2021/2022, ae o lo o faamoemoe e toe siitia i le 0.6% i le tausaga faaletupe fou 2022/2023.

II. VAAIGA TAULAI I LE LUMANAI

Lau Afioga i le Fofoga Fetalai,

Ina ia mautinoa le siitia ma le faaleleia o le tamaoaiga o si o tatou atunuu, o le a tumau pea le faatupulaia o tupe faaalu, e tusa ma Faiga Faavae o tupe faaalu a le Malo, ma o le a lagolagoina foi le Faiga Faavae tau tupe. E 0.6% o lo o fuafua e siitia ai le tamaoaiga i le tausaga faaletupe 2022/2023, e faavae i luga o le faamoemoe a le Malo ina ia toe tatalaina tuaoi faava-o-Malo ia Aokuso 2022 aemaise ai le faatinoga atoatoa o galuega ua ave i ai le faamuamua o le Tala o le Tupe. O ia galuega, e aofia ai polokalame mo le atinaeina o itumalo, o le faailogaina o le 60 tausaga o le Tutoatasi, faapea ma le 50 tausaga o le Iupeli Auro o le Faaputugatupe mo le Lumanai Manuia o Tagata, faatasi ai ma fesoasaoni tau tupe mo le toe uunaia o pisinisi ma Faalapotopotoga Tumaoti.

31 ME 2022

Saunoaga i le Tala Faatatau Autu o Tupe 2022/2023

O le Tala Faatatau Autu o le Tupe o lo o i luma nei o le laulau-a-Fono a le Palemene, o lo o fuafuaina ai le faasiliga o tupe alu na i lo o tupe maua, e tusa ma le 3.5% pe a fuafua i le tamaoaiga. O lenei faasiliga o lo o atagia mai ai le Faiga Faavae o tupe faaalu a le Malo, ina ia toe fatufatuai ai le tamaoaiga mo le tausaga faaletupe 2022/2023 ma isi tausaga faaletupe i luma atu. O le a faaauau pea ona ausia tapulaa mo tupe maua fuafuaina, faatasi ai ma le faamausali o le galueaina lelei o tupe faaalu a le Malo, aua le lava tapena mo faalavelave matuia, e pei o mala faale-natura, faamai ma isi.

O le a faaauau pea ona mataitu totoa le tapulaa o nonogatupe e fua i luga o le tamaoaiga, ma o lo o fuafua e taunuu i le 46.2% i le faaiuga o Iuni 2022. E le o i ai se faamoemoe e faia ni nonogatupe e maualuga tului i totonu o le isi tolu i le lima tausaga o lumanai. Ua ogatasi lea ma le taiala mo le fuafuaina ma le puleaina lelei o nonogatupe a le Malo 2022-2026.

III. TAIALA O LE TALA O LE TUPE.

Lau Afioga i le Fofoga Fetalai,

O le Tala Faatatau Autu o le Tupe ua faapea ona tuuina atu i le laulau-a-Fono, o lo o ogatasi ma le taiala mo le lumanai manuia o Samoa (2021/2022–2025/2026), ina ia ausia ai taiala autu nei:

- i. Faaleleia le Atinaega o le Soifuaga Lautele
- ii. Faalauteleina o Tamaoaiga ma Gafataulimaina
- iii. Saogalemu ma le Faatuatuaina o Pulega lelei
- iv. Siosiomaga Malupuiapuia ma Suiga o le tau.
- v. Tulaga i galuega a le Malo ma Atinae tetele.

O lo o faavae le faatatauina o tupe maua masani i luga o aafiaga o le maualuga o tau o oloa mai fafo, o lo o aafia ai tamaoaiga uma o atunuu o le lalolagi, e aofia ai ma Samoa. E leai foi ni lafoga fou o fuafuaina, sei vagana ai le siitia o lafoga ma tiute i luga o taumafa auina mai fafo, e ono faatupulaia ai faamai le pipisi. E le gata i lea, o le a tuuititia tiute i luga o nisi o oloa faatekonolosi, e lagolago ai le polokalame mo le uunaia o fesootaiga faatekonolosi i Samoa.

31 ME 2022

Saunoaga i le Tala Faatatau Autu o Tupe 2022/2023

Ina ia mautinoa le nofo sauni o Samoa mo faalavelave faafuasei, e aofia ai faalavelave matuia faasoifua maloloina.

O le Tala Faatatau Autu o le Tupe 2022/2023 o lo o aofia ai vaegatupe mo galuega muaau e tali atu ai i faalavelave matuia i lalo o Matagaluega nei, Matagaluega o le Soifua Maloloina, Matagaluega o Leoleo ma Falepuipui, Matagaluega o Faatoaga ma Faigafaiva, Matagaluega o le Palemia ma le Kapeneta, Matagaluega o Tiute ma Tupe Maua, Matagaluega o Punaoa Faale-natura ma le Siosiomaga, Matagaluega o Tupe faapea ma le Pulega o Galuega Tineimu ma Faalavelave Tutupu Faafuasei.

O lo o i ai foi tupe le fuafuaina i totonu o le Tala Faatatau Autu o le Tupe, faatasi ai ma le fesoasoani faaleoleo a Samoa mai le Faletupe o le Lalolagi ma le Faletupe o Atinae a Asia, mo tapenaga faaopoopo.

O nisi nei o auala o lo o faataatia mai i le Faiga Faavae mo Tupe e fesoasoani i tulaga lamatia mai faalavelave matuia 2022/2025.

O le a faaauau pea e le Malo ona:

- i. Siitia le tulaga mo le aoina mai o Tupe Maua, e auala atu i le faamallosia ma le mataituina o le tausisia o Tulafono i luga o lafoga ma
- ii. Ia mautinoa le faaaogaina lelei ma le tatau o tupe ua fuafuaina mo Matagaluega ma Faalapotopotoga a le Malo, e fua i luga o a latou taiala ma faiga faavae mo galuega fai i tausaga taitasi.

IV. OTOOTOGA O LE TALA O LE TUPE

Lau Afioga i le Fofoga Fetalai, o le a ou otoina atu loa vaega uma o le Tala Faatatau Autu o le Tupe mo le Tausaga Faaletupe 2022/2023.

TUPE MAUA	\$ 789,906,085
Tupe Maua Masani	\$ 643,728,051
Tupe Faameaalofa mai Fafu	\$ 146,178,034
	\$ 964,835,276

31 ME 2022

Saunoaga i le Tala Faatatau Autu o Tupe 2022/2023

TUPE FAAALU	\$ 964,835,276
Tupe Alu Faale-Tulafono	\$ 131,886,101
Polokalame o Tupe Alu	\$ 726,982,573
Tupe Faaalu le fuafuaina	\$ 21,809,477
Tupe Faaalu mo atinae	\$ 84,157,125
FAATUPEINA MAI	\$ 85,761,003
Faunegatupe mama e faatupe ai galuega tau atinae	\$ 1,303,441
Tupe fesoasoani tuusao mo le Tala i le Tupe	\$ 84,457,562
FESUIAIGA O TINOITUPE A LE MALO	\$ (89,168,188)

O le aotelega o le Tala i le Tupe ua faamoemoe e faamauina ai se faasiliga o tupe alu nai lo o tupe maua, e tusa lea ma le \$174.9 miliona. A faatulaga i lalo o le Auivi o Faamaumauga o Tupe a le Malo po o le Gouvernement Finance Statistics (GFS)¹, ona maua ai lea o le aotelega o le faasiliga o tupe alu i tupe maua a le Malo, e tusa ma le \$77.2 miliona po o le 3.5% o le tamaoaiga.

V. FAABAE O TUPE MAUA

Lau Afioga i le Fofoga Fetalai,

O le aotelega o Tupe Maua ma Tupe Faameaalofa a le Malo e faamoemoe o le a tuutiitia i le 12% i le tausaga faale-tupe o lo o lumanai, e afua mai lea i le toe fetuunaiga o le faataaatiaga o Tupe Fesoasoani tuusao mo le Tala i le Tupe (General Budget Support) lea ua faatulaga mo le faatupeina o le Faasiliga o Tupe Alu i Tupe Maua.

O Tupe Maua masani a le Malo (Ordinary Receipts) lea o lo o aofia ai lafoga ma isi tupe maua e ese mai i lafoga, e faamoemoe e siitia i le 1.3%.

O tupe aoina mai i Lafoga (Tax Revenues) o le a siitia i le 5 % ona o vaega nei:

- (i) Ua fetuunai ma siitia lafoga i luga o oloa e ono aafia ai le soifua maloloina o tagatanuu i faamai le pipisi pei o le tino puta, mai suka ma isi.
- (ii) O lo o faamoemoe e siitia le tamaoaiga pe a toe tatala tuaoi faava-o-Malo o Samoa i le lalolagi.

31 ME 2022

Saunoaga i le Tala Faatatau Autu o Tupe 2022/2023

O isi Tupe Maua e ese mai i lafoga (Non Tax Revenues) o lo o faamoemoe e pau i le 36%, ma e mafua ona o le toe faasee atu o auunaga mo le resitalaina o taavale afi i lalo o le Pulega o Felauaiga i le Laeleele mai i le Matagaluega o Leoleo ma Falepuipui.

O Tupe Faameaalofa mai i paaga a le Malo mo atinae i le faataatiaga o le Tala o le Tupe, o le a tuutiitia i le 44% ona o le toe faatulagaina o Fesoasoani Tuu Sao mo le Tala i le Tupe, pe tusa ma le \$84.5 miliona tala.

VI. GALUEGA FAATINO MA ATINAE O LO O AVE I AI LE FAAMUAMUA.

Lau Afioaga i le Fofoga Fetalai ma sui usufono mamalu o le Palemene,

O le aotelega atoa o Tupe Alu fuafuaina mo le tausaga o lo o loma nei 2022/2023, e \$964,835,276. O lenei aotelega o lo o aofia ai ma atinae ma polokalame faatupeina mai paaaga a le Malo mo atinae.

O le aotelega o Tupe Alu i le taimi nei o le a siitia i le 5% i le tausaga faale-tupe fou 2022/2023, ona o le siitaga i vaega tetele e 3 o lo o vaevaeina ai nei tupe faaalu faatatauina.

O Tupe Alu Faale-tulafono o le a siitia i le 21% talu ai le faamaeaina o le faamama avega lea sa tuusaunoa ai le tuusaunoaina o nisi o aitalafu a le Malo i tausaga faale-tupe e 2 ua mavae.

O polokalame o Tupe Alu a Matagaluega o le a siitia foi i le 21% i le tausaga faaletupe fou, ma o lo o atagia i le siitia ai o tupe alu mo galuega faatino a Matagaluega, faatasi ai ma galuega e ave ai ma sui o le Malo, aua le faatinoina o vaega o lo o ave i ai le faamuamua a le Malo e pei ona tolaulauina muamua.

A faatusa i le tausaga faale-tupe o lo o faagasolo nei, o tupe alu i atinae faatupeina mai paaga a le Malo, e faamoemoe o le a tuutiitia ona o le faamaeaina o nisi o polokalame e pei ona taua i le taimi ua sola.

Lau Afioaga i le Fofoga Fetalai, O le a ou ootoina atu loa vaegatupe ua faatatauina mo Matagaluega taitasi mo le tausaga faale-tupe 2022/2023.

1. Matagaluega o Faatoaga ma Faigafaiva - \$19,628,783.

- \$12,475,116 mo Galuega faatinoina e le Matagaluega;
- \$2,597,281 mo galuega e ave ai ma sui o le Malo;
- Galuega faatino tuuina atu i isi vaega.
\$4,506,385 mo le Faalapotopotoga o Suesuega Faasaienisi a Samoa.
\$50,000 mo le Sosaiete mo le Puipuiga o Manu (Animal Protection Society).

31 ME 2022

Saunoaga i le Tala Faatatau Autu o Tupe 2022/2023

O nisi nei o fuafuaga taua o lo o atagia i totonu o le Tala o le Tupe a le Matagaluega mo le tausaga faale-tupe fou e aofia ai.

- \$100,000 o le a faaagaga mo galuega e tali atu i faalavelave matuia;
- \$500,000 mo le uluai seleselega aua le uunaia o atinae uma tau i Faatoaga ma Faigafaiva;
- \$300,000 mo le faaauauina o le galuega e faatuina ai le pulega mo oloa auina atu i fafo (Export Authority).

O le a faaauauina foi le galulue faatasi ai ma paaga a le Malo mo atinae i le faatinoga o le polokalame mo le Fefaatauaiga o fua o Faatoaga ma Faigafaiva, polokalame faapisinisi mo faatoaga ma le polokalame mo le siitia o tomai mo le aotauina o metotia tau faatoaga.

2. *Matagaluega o Pisinisi, Alamanuia ma Leipa - \$20,764,302.*

- \$5,706,507 mo galuega faatinoina e le Matagaluega;
- \$2,045,384 mo galuega e avea ai ma sui o le Malo.
- Galuega Faatino tuuina atu i isi vaega.
\$9,562,411 mo le Pulega o Tagata Tafafao Maimoa mai Fafo, e aofia ai ma le Vaegatupe e \$2.5 miliona e faaauau ai le fesoasoani mo le Vaega Maoti mo Tagata Tafafao Maimoa mai fafo, e pei ona faatinoina i le tausaga nei, lea ua faalauina ai le \$4 miliona o le \$5 miliona sa faatatauina, ma ua faamanuiaina ai le silia ma le 160 o faletalimalo, ofisa Malaga ma isi auaunaga;
- \$450,000 mo le Ofisa Tutotonu mo le Atinae o Pisinisi a Samoa (Samoa Business Hub).
- \$3,000 o le fesoasoani mo Pisinisi Laiti. O le a faatinoina e le Ofisa Tutotonu mo le Atinae o Pisinisi a Samoa.

O le a faaauauina foi le galulue faatasi ai ma paaga a le Malo mo atinae aua le toe matimatiina o lenei vaega maoti taua o le tamaoaiga.

3. *Matagaluega o Fesootaiga ma Faamatalaga - \$9,389,050.* *Faatekonolosi.*

- \$2,976,864 mo Galuega Faatinoina e le Matagaluega;
- \$3,873,375 mo Galuega e avea ai ma sui o le Malo.
- Galuega faatino tuuina atu i isi vaega
\$2,538,811 mo le Ofisa o le Pule Faatonu.

31 ME 2022

Saunoaga i le Tala Faatatau Autu o Tupe 2022/2023

4. *Matagaluega o Aoga, Taaloga ma Aganuu - \$132,589,186.*

- \$76,403,345 mo Galuega Faatinoina e le Matagaluega;
- \$10,166,697 mo galuega e aveva ai ma Sui o le Malo;
- Galuega Faatino tuuina atu i isi Vaega.
\$17,726,320 mo le fesoasoani masani a le Malo mo aoga;
O le a faatumauina le fesoasoani lenei a le Malo mo aoga uma o le atunuu aua le lagolagoina o polokalame ma atinae e tali atu ai i fesuiaiga ua matauina, talu ona pepesi le Koviti-19 ma faamausaliina ai le ausia o taunuuga moomia mo lenei vaega maoti.
\$19,720,627 mo le Iunivesite Aoao o Samoa;
\$6,426,232 mo le Pulega o Faailoga ma Tusi Pasi Taualoa.
\$2,145,965 mo le Pulega o Fale ma Malae Taalo o Samoa.

O nisi nei o fuafuaga taua o lo o atagia i totonu o le Tala o le Tupe a le Matagaluega mo le tausaga faale-tupe fou e aofia ai le;

- \$2 miliona mo le faamautuina o le atinaeina o taaloga uma i totonu o Samoa, ma o le a fai faapaaga ma le pulega e faatonutonuina petipetiga a Samoa (Sports Development Fund).
- \$50,000 mo le Saofaiga Faatufugaga a Samoa (Samoa Arts Council).
O lenei vaegatupe o le a fesoasoani i le atinaeina o lenei alagaoa mo le tatou tamaoaiga. Ua ogatasi foi ma fuafuaga mo le tatalaina o le Maota fou mo faatufugaga ma aganuu i Malifa, e toe fafagu ma atinae ai taleni eseese e atagia ai la tatou aganuu ma le agaifanua.

O le a faaauauina foi le galulue faatasi ai ma paaga a le Malo mo atinae i vaega nei e aofia ai le fausiaina o faleaoga Tulaga Lua, siitia avanoa sikolasipi mo Matata Eseese, ma le fale fou mo Suesuega faa-Saoifua Maloloina a le Iunivesite Aoao o Samoa, aemaise ai o le faatotogaina o Aoga i tualga tau Tekonolosi.

5. *Matagaluega o Tupe - \$104,950,475.*

- \$15,492,223 mo galuega faatinoina e le Matagaluega;
- \$89,458,252 mo galuega e aveva ai ma sui o le Malo;

O nisi nei o fuafuaga taua o lo o atagia i totonu o le Tala o le Tupe a le Matagaluega mo le tausaga faale-tupe fou e aofia ai le:-

- \$1 miliona o le a faaagaga mo galuega e tali atu i faalavelave matuia.

31 ME 2022

Saunoaga i le Tala Faatatau Autu o Tupe 2022/2023

- \$5 miliona le vaega tupe o le a tuuina atu i le Faletupe mo Atinae o Samoa e faatino ai le polokalame faapitoa a le Malo mo nonogatupe e mama aiaiga mo pisinisi uma.
- \$2 miliona le vaegatupe e faaauau ai le penefiti mo e o lo o i ai aafiaga tumau.
- \$500,000 le vaegatupe e faaauau ai le polokalame mo le fausiaina o fale mo tagatanuu e lima vaivai ma le tagolima;
- \$15.3 miliona le aofaiga atoa o le sao a le Malo mo atinae tetele, o lo o faatupeina e paaaga a le Malo mo atinae;
- \$33.4 miliona le vaegatupe mo penisione mo tagata matutua.

6. *Matagaluega o le Va-i-fafo ma Fefaatauaiga - \$25,808,267.*

- \$22,829,013 mo galuega faatinoina e le Matagaluega e aofia ai Ofisa uma a le Malo i atunuu i fafo;
- \$2,979,254 mo galuega e avea ai ma Sui o le Malo;

O le Tausaga Faaletupe 2022/2023, o lo o aofia ai vaegatupe faatatauina mo le ofisa fou a le Amepasa a Samoa i Sineva, Suiselani ma o lo o taulalata i le Ofisa tutotonu o Fefaatauiaga (WTO). O se avanoa lelei lea mo le faalauiloa atu o faiga faavae tau fefaatauaiga a le atunuu i le lalolagi. O lo o i ai foi le faamoemoe mo le tatala aloaia o le Ofisa fou a le Malo o Samoa i Ueligitone.

7. *Matagaluega o Soifua Maloloina - \$140,443,598.*

- \$108,414,360 mo galuega e faatinoina e le Matagaluega;
- \$16,899.304 mo galuega e avea ai ma sui o le Malo;
- Galuega faatino tuuina atu i isi Vaega.
\$9,329,934 mo le Faalapotopotoga Faavae Tau Fatugao o Samoa.
\$5,000,000 mo gasegase auina atu i fafo.
\$250,000 mo galuega a le falemai o faamai le pipisi.
\$550,000 se aofaiga atoa o fesoasoani o le a faamatuuina atu i Faalapotopotoga Tumaoti o lo o galulue soosoo tauau ma le Matagaluega e aofia ai le Koluse Mumu (Red Cross), Sosaiete mo le Kanesa (Cancer Society), GOSHEN Trust, METI, Agape Clinic ma le Asosi o le Soifua Manuia o Aiga (Samoa Family Health Association).

O nisi nei o fuafuaga taua o lo o atagia i totonu o le Tala o le Tupe a le Matagaluega mo le tausaga faale-tupe fou e aofia ai le:-

31 ME 2022

Saunoaga i le Tala Faatatau Autu o Tupe 2022/2023

- 500,000 o le a faaagaga mo galuega e tali atu i faalavelave matuia;
- \$1 miliona e faaauau ai le galuega mo le faaleleia o falemai faaitumalo;
- \$1 miliona e faaauau ai le galuega mo fale apitaga mo fomai;
- \$3.9 miliona e faaauau ai le polokalame mo le tuutiitia o aafiaga o faamai le pipisi;
- \$1.5 miliona e faaauau ai le faafaigaluegaina o tausi soifua ma fomai faatoa faauu.

O le a faaauauina foi le galulue faatasi ai ma paaga a le Malo mo atinae e aofia ai le polokalame e foia ai le faatupulaia o faamai le pipisi, polokalame e tali atu ai i aafiaga o le Koviti-19, o le polokalame e faaauau ai le faatinoina o tui puipui mo le fanau laiti mai faamai o le niuonia, fiva taifo ma le kanesa, aemaise ai o aaoaga mo le faagavaaina o le aufaigaluega.

8. *Matagaluega o Faamasinoga ma le Faafoeina o Tulaga Tau Faamasinoga - \$14,259,855.*

- \$12,788,399 mo galuega faatinoina e le Matagaluega;
- \$1,471,456 mo galuega e avea ai ma sui o le Malo.

O nisi nei o fuafuaga taua o lo o atagia i totonu o le Tala o le Tupe a le Matagaluega mo le tausaga faale-tupe fou e aofia ai le:-

- \$450,000 e faatino ai auaunaga faaloia mo le mamalu o le atunuu, e le gafatia le tau o loia mo latou faamasinoga;
- \$325,543 mo le fuataga o tuaoi mo faamasinoga o lo o faatinoina i luga o Fanua ma Suafa.

9. *Matagaluega o Punaoa Faale-natura ma le Siosiomaga – \$26,621,187.*

- \$13,988,054 mo galuega faatinoina e le Matagaluega;
- \$12,633,133 mo galuega e avea ai ma sui o le Malo.

O nisi nei o fuafuaga taua o lo o atagia i totonu o le Tala o le Tupe o le Matagaluega mo le tausaga faale-tupe fou e aofia ai le:

- \$200,000 tala o le a faaagaga mo galuega e tali atu i faalavelave matuia;
- \$4.2 miliona tala mo konekarate aua le faamamaina o le taulaga ma le aoina o lapisi;
- \$2 miliona mo le totogiina o tau o fanua aua faasao a le Malo.

31 ME 2022

Saunoaga i le Tala Faatatau Autu o Tupe 2022/2023

O le a faaauauina foi le galulue faatasi ai ma paaga a le Malo mo atinae e aofia ai, polokalame e mafai ona tetee ma tali atu i aafiaga o fesuiaiga o le tau, polokalame mo le faaleleia ma le siitiaina o le faaaogaina o masini e mafai ona faasalalau vave ai lapataiga mo faalavelave faafuasei, polokalame mo le siitiaina o tulaga mo le fausiaina o fale, aemaise o aoaoga mo le faaleleia o tomai ma agavaa.

10. Matagaluega o Leoleo ma Falepuipui - \$51,640,543.

- \$34,974,877 mo galuega faatinoina e le Matagaluega;
- \$3,867,317 mo galuega e avea ai ma sui o le Malo;
- Galuega faatino tuuina atu i isi Vaega;
\$12,798,349 mo le Pulega o Galuega Tineimu ma Faalavelave Tutupu Faafuasei.

O nisi nei o fuafuaga taua o lo o atagia i totonu o le Tala o le Tupe a le Matagaluega mo le tausaga faale-tupe fou e aofia ai le:

- \$500,000 o le a faaagaga mo galuega e tali atu i faalavelave matuia;
- \$900,000 o le vaegatupe masani mo toniga a malu o le Malo;
- \$70,000 mo le tatou faiga paaga ma le Faalapotopotoga o Leoleo Faava-o-Malo (Interpol).

O le a faaauauina foi le galulue faatasi ai ma paaga a le Malo mo atinae e aofia ai, le aoga faapitoa mo Leoleo ma le fausiaina o le falefaapitoa mo suesuega, aemaise o aoaoga mo le siitia o nei auaunaga aua le faamausaliina o le malu puipuia, saogalemu ma le toafilemu o le atunuu atoa.

11. Matagaluega a le Palemia ma le Kapeneta – \$10,086,514.

- \$6,713,221 mo Galuega Faatinoina e le Matagaluega;
 - \$3,373,293 mo Galuega e Avea ai ma Sui o le Malo.
- O nisi nei o fuafuaga taua o lo o atagia i totonu o le Tala o le Tupe a le Matagaluega mo le tausaga faale-tupe fou e aofia ai le:
- \$100,000 o le a faaagaga mo galuega e tali atu i faalavelave matuia.
 - \$500,000 mo le faatauina mai o tusi folau fou.
 - \$1 miliona mo le faatupeina o polokalame eseese i le tausaga atoa mo le faamanatuina o le 60 tausaga o le Tutoatasi o Samoa.

12. Matagaluega o Tiute ma Tupe Maua - \$12,962,866.

- \$10,183,725 mo galuega faatinoina e le Matagaluega;
- \$2,779,141 mo galuega e avea ai ma sui o le Malo.

31 ME 2022

Saunoaga i le Tala Faatatau Autu o Tupe 2022/2023

O nisi nei o fuafuaga taua o lo o atagia i totonu o le Tala o le Tupe o le Matagaluega mo le tausaga faale-tupe fou e aofia ai le;

- \$100,000 o le a faaagaga mo galuega e tali atu i faalavelave matuia;
- \$681,155 mo le konekarate ma le Data Tech International mo le polokalame o lo o faatinoina ai le mataituina o lafoga totogi i luga o oloa ma auaunaga.

13. Matagaluega o Tina ma Tamaitai, Atinae o Nuu, Afioaga ma Agafesootai - \$63,679,430.

- \$11,138,908 mo galuega faatinoina e le Matagaluega;
- \$52,540,522 mo galuega e avefa ai ma sui o le Malo.

O nisi nei o fuafuaga taua o lo o atagia i totonu o le Tala o le Tupe a le Matagaluega mo le tausaga faale-tupe fou e aofia ai le:

- \$51 miliona mo le faatupeina mo atinae a itumalo e 51, o le Sini Autu o leni polokalame ia faaleleia le atinaega o le Soifuaga Lautele mo le manuia o tatou tagata, ma e amata mai lea i le atinaeina o itumalo e faaaogaina ai lava o latou taimi, malosi ma tomai i le faaaogaina o le 'oa faalenatura ma le siosiomaga e pei o laufanua, vaiata ma le sami ua foai e le Atua i lea itumalo ma lea itumalo.
- O le faamoemoe o le Malo e pei ona maioio i lana Taiala mo le Lumanai Manuia o Samoa i lalo o le Taiala Autu Muamua (Key Strategic Outcome 1):
 1. Ia faasafua avanoa mo se lumanai manuia o tatou tagata ina ia faaititia le Mativa ma le le Tagolima.
 2. Ia faaleleia le Soifua Maloloina mo le lautele.
 3. Ia lelei Aoaoga ma ia faaaupegaina Tagata i Avanoa mo le Soifua Manuia.
 4. Ia mausali faiga faavae ma pulega lelei a Komiti o Itumalo ma ia faatino atinae e mafai ona manuia uma ai tagata o le itumalo.
 5. Ia uunaia atinae i totonu o Nuu ma Afioaga e pei o faatoaga, faigafaiva ma faasao, atinae o tagata tafafao mai fafo faapea atinae o pisinisi laiti ma isi lava atinae eseese e le o mafai ona tatalaina e aunoa ma le aapa atu o le Malo e taitai ma faatino lana pitolaau o le faamalosi o ni faiga paaga mausali ina ia ola ma manuia atinae o le a faatinoina e itumalo.

O le a galulue faatasi ai le Matagaluega o Tina ma Tamaitai, Atinae o Nuu, Afioaga ma Agafesootai, faatasi ma Matagaluega ma Ofisa uma a le Malo ina ia faafaigofie le faatinoina o nei atinae mo itumalo.

31 ME 2022

Saunoaga i le Tala Faatatau Autu o Tupe 2022/2023

E i ai le naunautaiga a le Malo, o se avanoa faaauuro lenei ua maua e tatou Itumalo e atinae ai ai e le gata mo le manuia i le taimi lenei ae faapea foi mo le lumanai.

- \$300,000 tala le vaegatupe e faamaea ai le polokalame o lo o faagasolo nei mo Komiti Tumama;
- \$500,000 tala le fesoasoani e tuuina atu mo faalapotopotoga tumaoti aua polokalame e patino mo tina ma tamaitai, autalavou, ma le fanau iti.

O le a faaauauina foi le galulue faatasi ai ma paaga a le Malo mo isi atinae e mafai ai ona faamalosia le pitolaau a le Matagaluega i le lagolagoina o le Atinae mo Itumalo ma isi lava galuega faatino i nuu ma afioaga o lo o feagai ma le Matagaluega.

14. Matagaluega o Galuega, Felauaiga ma Atinae Tetele – \$47,541,804

- \$5,504,416 mo Galuega Faatinoina e le Matagaluega;
- \$1,195,684 mo Galuega e Avea ai ma Sui o le Malo;
- Galuega Faatino Tuuina atu i isi Vaega
\$35,541,704 mo le Pulega o Felauaiga i le Laueleele;
\$3,300,000 fesoasoani tuusao mai e le Iuni o Europa mo le Pulega o le Suavai;
\$1,000,000 mo le Pulega o Suavai aua galuega faamama avega mo le atunuu (CSO)
\$1,000,000 mo le Pulega o Malosiaga Tau Eletise aua galuega faamama avega mo le atunuu (CSO)

O nisi nei o fuafuaga taua o lo o atagia i totonu o le Tala o le Tupe a le Matagaluega mo le tausaga faaletupe fou e aofia ai le:

- \$500,000 tala le vaegatupe o le a faaagaga mo le fausiaina o taligalu aua le puipuia o nuu ma afioaga tulata i le sami.

O le a faaauauina foi le galulue faatasi ai ma paaga a le Malo mo atinae e aofia ai, le polokalame mo le faaleleia o le aualatele mai Malua e agai atu i Faleolo, polokalame mo le faamalosia ma le siitiaina o le saogalemu o itu-mauga i le itu sasae o le talafatai o Apia, polokalame mo le faaleleia o aualatele i le itu sasae o Apia ma le malupuipuia o aseta tetele a le malae vaalele i Faleolo, faapea foi ma le toe faaleleia o le uafu i Apia ma le auala mai Tanugamanono agai i Siumu (Central Cross Island Road).

31 ME 2022

Saunoaga i le Tala Faatatau Autu o Tupe 2022/2023

15. Ofisa o le Loia Sili - \$5,469,502

- \$4,750,000 mo Galuega faatinoina e le Ofisa;
- \$719,502 mo Galuega e Avea ai ma Sui o le Malo;

16. Ofisa o le Pule ma le Suetusi Sili - \$4,006,672

- \$3,406,343 mo Galuega faatinoina e le Ofisa;
- \$600,329 mo Galuega e Avea ai ma Sui o le Malo;

17. Ofisa o le Komesina o Faiga Palota - \$2,929,812

- \$2,589,143 mo Galuega faatinoina e le Ofisa;
- \$340,671 mo Galuega e Avea ai ma Sui o le Malo;

18. Ofisa o le Failautusi o le Fono Aoaofaitulafono - \$7,355,133

- \$6,060,833 mo Galuega faatinoina e le Ofisa;
- \$1,294,300 mo Galuega e Avea ai ma Sui o le Malo;

O nisi nei o fuafuaga taua o lo o atagia i totonu o le Tala o le Tupe a le Ofisa mo le tausaga faaletupe fou e aofia ai le:

- \$250,000 tala e faaauau ai le galuega mo le toe iloilo o le Faavae o le Malo Tutoatasi o Samoa e pei ona amatalia i le tausaga faaletupe nei;
- \$200,000 tala o le vaegatupe mo Vaega Faaupufai;
- \$150,000 tala mo le polokalame aua le faalauteleina o le tomai ma le silafia a sui mamalu o le Palemene;
- \$50,000 tala mo aoaoga ma sootaga ma tagata lautele.

O le a faaauauina foi le galulue faatasi ai ma paaga a le Malo mo atinae mo le galuega amata o le Ofisa Fou o le Fono Aoaofaitulafono.

19. Ofisa o le Komesina o Sulufaiga - \$1,653,695

- \$1,426,354 mo Galuega Faatinoina e le Ofisa;
- \$227,341 mo Galuega e Avea ai ma Sui o le Malo;

20. Ofisa o le Komisi o Tagata Faigaluega a le Malo - \$8,788,431

- \$4,728,299 mo Galuega Faatinoina e le Ofisa;
- \$4,060,132 mo Galuega e Avea ai ma Sui o le Malo;

31 ME 2022

Saunoaga i le Tala Faatatau Autu o Tupe 2022/2023

O nisi nei o fuafuaga taua o lo o atagia i totonu o le Tala o le Tupe a le Komisi mo le tausaga faaletupe fou e aofia ai le:

- \$3.2 miliona tala le vaegatupe e faaauau ai polokalame faasikolasipi mo le fanau aoga i le Iunivesitele Aoao o Samoa.

21. Ofisa o Fuainumera Faamauina - \$5,887,995

- \$4,407,376 mo Galuega Faatinoina e le ofisa;
- \$1,480,619 mo Galuega e Avea ai ma Sui o le Malo;

O nisi nei o fuafuaga taua o lo o atagia i totonu o le Tala o le Tupe a le Ofisa mo le tausaga faaletupe fou e aofia ai le:

- \$500,000 tala le vaegatupe mo le faatinoina o le suesuega o alatupe ma tupe alu mo aiga taitasi (HIES);
- \$143,483 tala le vaegatupe mo le faatinoina o le suesuega i luga o le faitauaofai o tagata faigaluega (Labour Force Survey), aemaise ai o le tapueina o faamaumauga o aafiaga o le KOVITI-19.

22. Komisi o le Fuataiga o Tulafono - \$1,410,985

- \$1,158,819 mo Galuega Faatinoina e le Komisi;
- \$252,166 mo Galuega e Avea ai ma Sui o le Malo;

23. Matagaluega mo Faalapotopotoga a le Malo - \$9,114,490

- \$2,485,397 mo Galuega Faatinoina e le Matagaluega;
- \$6,629,093 mo Galuega e Avea ai ma Sui o le Malo;

23. Matagaluega mo Faalapotopotoga a le Malo - \$9,114,490

- \$2,485,397 mo Galuega Faatinoina e le Matagaluega;
- \$6,629,093 mo Galuega e Avea ai ma Sui o le Malo;

VII. TUPE LE FUAFUAINA

O le aotelega o tupe faatatauina mo Tupe Le Fuafuaina i le Tausaga Faaletupe 2022/2023, e tusa lea ma le \$21.81 miliona tala.

31 ME 2022

Saunoaga i le Tala Faatatau Autu o Tupe 2022/2023

VIII. TALA FAATATAU FAAOPOOPO LONA LUA O LE TUPE 2021/2022

Lau Afioga i le Fofoga Fetalai,

O lo o auina atu foi le Tala Faatatau Faaopoopo Lona Lua o le Tupe 2021/2022 i luma o le Laulau-a-Fono a le Palemene. O lenei Tala Faatatau Faaopoopo Lona Lua o lo o moomia, aua le faatupeina o nisi o talosaga faaopoopo a le Matagaluega o le Soifua Maloloina ma le Matagaluega o Leoleo ma Falepuipui faatasi ai ma se fesoasoani mo le Faletupe o Atinae. O nei tupe alu faaopoopo o le a faatupeina lea mai fesoasoani faaopoopo mai Paaga a le malo mo Atinae (e aofia ai Ausetalia ma Niu Sila aemaise ai foi se vaega o Tupe Faaagaaga a le atunuu aua Faalavelave Tutupu Faafuasei mai le Faletupe o Atinae a Asia) faatasi ai ma nisi o fetuunaiga o tupe alu.

IX. TUPE FAAALU MO ATINAE

Lau Afioga i le Fofoga Fetalai,

E faamauina pea le agaga faafetai i a tatou Paaga mo Atinae (Development Partners), ona o le latou lagolago faifaiepa ma le fai paaga mausali ma le tatou Malo, e aofia ai lo latou sao taua i le tapenaga a Samoa, ina ia mautinoa le tali atu i aafiaga o le KOVITI-19 ma isi faalavelave tutupu faafuasei. Aemaise ai fesoasoani faaauau mo vaega maoti uma o le tamaoiga.

E \$82.9 miliona tala le aofaiga o fesoasoani faameaalofa, o lo o fuafua e faatupeina mai i polokalame atinae e 52, o lo o faatinoina e Matagaluega ma Faalapotopotoga a le Malo. E \$24.2 miliona tala o lo o fuafuaina mo fesoasoani i vaega maoti e fa (4) e aofia ai le Vaega Maoti o Aoga, Soifua Maloloina, Suavai, ma Faatoaga ma Faigafaiva. O vaega faaleoleo (Standby Facilities) mo Samoa, sa talosagaina lona faamatuuina mai, ina ua faamaonia le pepesi o le KOVITI-19 i tua i nuu ma afioaga ia Mati 2022. O nei fesoasoani o lo o faatupeina mai i tupe faaleoleo mo faalavelave faafuasei a Samoa i le Faletupe o le Lalolagi (CAT-DDO), ma le Faletupe o Atinae a Asia (CDF).

E talitonu o lea ua faamautuina le tatou galulue soosootauau ma a tatou paaga mo atinae, sa lagolago malosi i la tatou folauga i lenei 60 tausaga. E saga faafetaia ai pea lo latou sao taua, aua fesoasoani le au maua mo le atinae o Samoa. O le a faaauuina pea le tatou faiga paaga, ina ia ausia le taunuuga moomia o le Taiala mo le Lumanai Manuia o Samoa!

31 ME 2022

Saunoaga i le Tala Faatatau Autu o Tupe 2022/2023

X. UPU FAAIU

Lau Afioga i le Fofoga Fetalai,

O le Tala Faatatau Autu o Tupe 2022/2023, o le uluai Tala o le Tupe lenei a le Faigamalo, o le a faatino i le 12 masina.

E le i faigofie foi la tatou faigamalaga i le tauatinaeina o le tatou atunuu i le tausaga faaletupe muamua.

E lagona ai lava le faagaetia, ona o le faaauau pea o le lagolagosua ma le sao o tatou nuu ma afioaga, vaega tumaoti ma faalapotopotoga tumaoti, e le gata i le tausaga faaletupe lenei o le a faamaeaina, ae faapea foi i tausaga e tele ua mavae.

O lo tatou atunuu e Faavae i le Atua, e ao ai ona tatou galulue felagolagomai e pei o se “aiga potopoto”, aua le uunaia o le tamaoaiga o Samoa. **“Folau faatasi, e faamaite le faatupulaia o le tamaoaiga ina ia mausali, mo le manuia o Samoa”.**

O le aso a taeao, o le a faamanatuina ai le 60 tausaga talu ona tutoatasi lo tatou Malo! Ia alo maia! Tatou folau faatasi i le isi 60 tausaga o lumanai, i le faatuatua ma le loto gatasi!

Lau Afioga i le Fofoga Fetalai,

E ia te au le ava tele e tatau ai, ou te tuuina atu ai le Tala Faatatau Autu o le Tupe 2022/2023 i le Palemene o Samoa ua potopoto, mo la outou faatofalaiga, a o fotuai mai le aso taua i le talafaasolopito o si o tatou atunuu!

O le matou tatalo, “Ia faamanuia mai le Atua Pulepuletetele, i le faamanatuina o le 60 Tausaga o le Malo Tutoatasi o Samoa”.

Soifua ma ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga a le Minisita o Tupe.

FOFOGA FETALAI: Ua faamalo faafetai saunoa i lau Afioga i le Minisita o Tupe. Atonu o lea foi ua faafogafoga ma le totoa ma le manino le paia o le Maota i le folasaga malamalama ma le manino. O le mea lea, ia faamalo tapena, faafetai foi sauni, faafetai foi saunoa faaaloalo.

E tusa ai ma le Tulafono Tumau 133, o le a tolopo felafolafoaiga i le Tulafono Tau Faaofi o le Faatatauina o Tupe 2022/2023, e le itiiti ifo i le 14 aso a o tuuina atu le Tala Faatatau Autu o Tupe Faaopoopo (Nu.2) 2021/2022 mo le iloiloga a le Komiti o Tupe Maua ma Tupe Totogi ma toe lipoti mai i le Fono Aoao.

31 ME 2022

Saunoaga i le Tala Faatatau Autu o Tupe 2022/2023

Ia, talu ai o lea ua tatou... Se i tulai mai lau Afioga i le Palemia.

Afioga Hon FIAME NAOMI MATAAFA (Palemia): Faafetai tele i lau Afioga i le Fofoga Fetalai mo le avanoa. Faafetai foi i le saunoaga a le Afioga i le Minisita o Tupe ua faataatia ai le tatou Tulafono o le Tala Faatatau o le Tupe mo le 2022/2023.

Faamolemole lau Afioga i le Fofoga Fetalai, ou te fia faaaogaina le avanoa o le tauaofia o le Fono, a o taeao le tatou Sisigafua. Ua i ai se finagalo o le tatou Komiti o Tapenaga mo le Sisigafua e tauala atu i le Afioga i le sui usufono, o sina meaalofa laitiiti a le Komiti e lagolago ai le faamoemoe o tatou itumalo lea o lo o faatino lava a latou faailo mo le tatou 60 i le aso a taeao. O lo o avanoa le Ofisa o le Tupe i le Maota i tua e mafia ona faaooina atu ai i Afioga i sui usufono sia meaalofa laitiiti mo itumalo. Faafetai.

FOFOGA FETALAI: Malo faafetai i lau Afioga i le Tamaitai Palemia mo lea foi fesoasoani mo tatou itumalo.

Ia talu ai o lea ua tatou taunuu i le taimi o le tatou malologa masani o le taeao, o lea o le a faataatiaese ai galuega a le Fono Aoa mo lana malologa masani.

Na faataatiaese Taulumaga a le Fono Aoa Faitulafono mo lana malologa masani i le itula e 10:48 i le taeao ma toe faaauau i le itula e 11:35 i le taeao.

FOFOGA FETALAI: Ou te faasilasila atu ua toe amatalia nei Taulumaga o le Fono Aoa Faitulafono.

I le toe talii mai ai i le tatou malologa, e i ai le manatu ua matu i fau le taligasua a le paia o le Palemene. Faafetai i le Atua i Lana foai, ua maua foi le faasiligamalosia e faaauau ai le tatou galuega, malo faafetai.

E faataatiaese a tatou Taulumaga mo le malologa o le taeao, ua maea le saunoaga a le Afioga i le Minisita o Tupe i le Tala Faatatau Faaopoopo o Tupe (Nu.2) 2021/2022 ma le Tala Faatatau Autu o Tupe 2022/2023. O le galuega e sosoo ai.

31 ME 2022

ILOILOGA O LIPOTI A KOMITI FAA-PALEMENE

P.P.2022/2023 NU.1, LIPOTI A LE KOMITI SUESUE FAAPITOA A LE PALEMENE I LE P.P.2021/2022 NU.36, LIPOTI O LE TAUNUUGA O LE SUESUEGA E FAATATAU I LE MATAUPU NA LAGA E LE LOIA SILI E UIGA I TEUTEUGA O LE FAAVAE 2020 & TULAFONO O FANUA MA SUAFA 2020

FOFOGA FETALAI: Mo le silafia e le mamalu o le Palemene, o le aso 4 o Me 2022 na faataatia ai i le Laulau-a-Fono le Lipoti a le Komiti Faapitua i le Galuega na faatonuina ai e le Fono Aoaofaitulafono.

O le aso, faatoa maua ai se laolao e iloilo ai e le Palemene leni lipoti ona na ave lana faamuamua i le lipoti a le Komiti o Tulaga Aloaia ma Amio Taualoa.

Ma o le avanoa leni ou te tapa ai lau Afioga i le Taitaifono o le Komiti Suesue Faapitua, lau Afioga Auuapaa Mulipola Aloitafula Mulipola.

Afioga AUUAPAAU MULIPOLA ALOITAFUA MULIPOLA (Taitaifono o le Komiti Suesue Faapitua a le Palemene): Lau Afioga i le Fofoga Fetalai, ou te faatu le lafo, *Ina ia faamaonia e le Fono Aoaofaitulafono le Lipoti a le Komiti Suesue Faapitua e faatatau i le Mataupu na laga e le Loia Sili e uiga i Teuteuga o le Faavae 2020 ma le Tulafono o Fanua ma Suafa 2020 o lo o tuuina atu ai ana Sailiiliga ma ana Fautuaga.*

Faaluaia e le Minisita mo Galuega, Felauaiga ma Atinae Eeseese.

FOFOGA FETALAI: Tulai mai lau Afioga i le Taitaifono o le Komiti Suesue Faapitua mo le tolaulauina o Sailiiliga, Fautuaga ma le Iugafono a le outou Komiti.

Afioga AUUAPAAU MULIPOLA ALOITAFUA MULIPOLA: Lau Afioga i le Fofoga Fetalai, ou te folasia i luma o le Palemene le Lipoti a le Komiti Suesue Faapitua mo le silafia e leni Maota ma le faafofoga tapuai mai a Samoa.

O le a lelepa ia faa-vaatiu le mamalu o leni Maota, e faigata o lele ua piioga le aleaga o tautai e pei o le fesilafaiga i siutila ma ulula. Ta te tu foi le lilifa o vanu ma ou solia siupapa. Na ou matua faatalitali lava i le Alii ona faasaga mai lea o Ia ia te au. Ua faafofoga mai foi o Ia i la'u alaga, ua tuuina mai e ia le pese fou i lo'u gutu, o le Viiga i lo tatou Atua, e iloa ai e le toatele, e matatau foi i latou ma o latou faatuatua i le Alii.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

E fia fonofaapipii se faafetai i le taulaga na e siitia lau Afioga i le Fofoga Fetalai i lo tatou vatapuia ma le mataisau o le foafoaga, ua maea ai ona e momoli mea i faletui i le taeao ua tuanai. E manatu i lenei itula ua sola le nuu tutai ae ua laga le mauga talimalama i le Maota lenei. O lea foi ua logo ma ua togo lelei malama i le ata nai le Faletuamasaga ma lona vai o Tofuola, ina ua itemalo le pule ma le launiu na fatiala, na ae ai le olasala a Paiatea ma Paialala. Ua lele tipatipa le malolo i vasa, ae ua taufai puea foi le matila ma le ofeloa i lenei aso. O le aso foi e le o se taatumalae po o se tofaleauga faaalualuo le Maota nei, ae o le aso lava ua saasaa faamanuuli i puoo le fiafia. Ua lulu fulufufiso foi lagona o le tulai ina ua lelefu sigano le taeao ina ua tatou feiloai i mauga o ao ae ua le o liulaumea. E ui lava i le soifuaga nei e taupe le tila taupe foi le faga, ae o le alofa lava ia o le Atua e iloa i ataata o taulelei i tafatafailagi lona mamalu maliolagi.

E faatalofa atu i lau Afioga i Le Ao Mamalu o le Malo ma lau Masiofo. E faatalofa atu foi i lau Afioga i le Sui o le Fono a Sui Tofia ma lou faletua. E faafeiloai ma faatalofa atu i lau Afioga i le Faamasino Sili ma le Matagaluega o lo o faafoefoeina tulaga tau faamasinoga a lo tatou Malo.

Talofa Samoa le atunuu pele, le paia i Aiga ma latou Tama, o Tama ma o latou Aiga, Tumua ma Pule, Aiga i le Tai ma le Vaa o Fonoti, o Aiga o Nofo, Aiga o Papa, o Aiga foi na Tafai, e Tafaitia, Tafaitoto, e Tafai foi i Fetalai.

E le faagaloina foi Afia i si ona vao i nai o tatou uso ma le Faigamalo i Sasae. Le paia aua le afio o lau Afioga i le Kovana Sili ma le Lutena Kovana o Maota e Lua ma ona sui usufono uma ma le Faigamalo. E faatalofa atu. O le paia lava lea aua le afifio o Maopu ia Sua ma le Vaifanua, Ituau ma Alataua, Fofu ma Aitulagi, Saole ma Saleaamua ma le Launiu Saelua. A o ni paia apoapogata aua le Motusa i le Laau na Amotasi, Faatuiolemotu ma Tootoo o le Faleula, le Faleula Tauaitu ma le Faleula Tautagata ma upu ia te Oe le Manuatele.

E faaleo foi le faatalofa fiafia atu i Ofisa Sili o Pulega o Matagaluega o le Malo ua tatou faatasi, o Faalapotopotoga Tumaoti, le Aufaipisinisi ma Samoa ua potu i Tiafau nei aua le tapuaia o le Fonousu a Samoa. Faamalo le taupati mai ma le onosai, e le faigofie le pale ma le folau.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

E faamuliai le faatalofa ae ua ao i ai malae o faalupega uma o Samoa i le aufaigaluega tofofi o le talalelei i so o se tafa o le lalolagi nei, aua le utugataufa i le Atua le Silisiliese ma Lona finagalo. O lo o outou fusifusia taulaga ma tuuina i nifo o fatafaitaulaga ina ia mu ma manogi i luma o Lona Nofolii.

E faatalofa atu foi i so o se Samoa lava i atunuu mamao o lo o maua mai le malolosi o peau galugalulu o nei faasalalauga a lau Palemene. Malo afua ailao ua maua. E pau le moana o ona gafa, ae le faagatua foi le tulai o lou tagata se i faaleo le faugagana ma gogouli, o lou gogouli ma gogosina o le Maota.

Lau Afioga i le Fofoga Fetalai, ua le po malae i le tulai ona se i momoli mai le i'a lautua i le tali paepae i le alofa o le Atua.

Ina ua maea ai Saililiga a le Komiti Suesue Faapitoa lenei a le Palemene na se i faatu ai le lafo i totonu o le Maota Fono lenei mo se Saililiga auiliili ona o se toatuga ua aliae mai i Tulafono e 2. Tulafono muamua, o le Tulafono o Teuteuga o le Faavae 2020 ma le Tulafono e 2, o le Tulafono o Fanua ma Suafa 2020.

O le upu moni lau Afioga i le Fofoga Fetalai ma le paia o lenei Palemene, sa asa e lenei Komiti Suesue Faapitoa uluvai ma magavai, na se i saili lava le amiotonu a o le afuaga o le toatuga, ma sa o matou fagogota i pasina i le gataifale, na matou faaeva foi i pausi. Sa matou asiasi i lagi, sa matou asiasi foi i Salefee se i to ni manu mo le Palemene nei. Sa matou tofi i le moana se i saili penina i tifa atia, ma le faanaunautaiga, se i faamalieina le Maota nei, ne i afua le velevelegatupua ma ae fua le velevelegatupua a le Komiti, ma aua ne i tauvale le pua nai Aganoa.

Ua matauina e le Komiti nei e 4 ni lomiga o ia Tulafono ua eseese le lolomiina ma ua atagia ai le le vasaga o nei lomiga ma o latou faauigaina ma le anoliu faaiuina o Tulafono na pasia e Maota ma ua matauina ua satia.

Lau Afioga i le Fofoga Fetalai, e talu ai ona e fai si tele o le Lipoti, ae masalo foi ua nofofale ia Satuiamaa i le mamalu o sui usufono ona ua fai si leva ona tuuina atu, ina afua ai saililiga a le sui usufono lava ia. Ae tau ia ina ou ao le malae mai lea itulau i lea itulau. E talu ai ona o le tele o itulau o lenei Lipoti tusitusia, o le a ou taumafai e auiliili atu uiga loloto manino ma le maioio o lo o taua i lea itulau ma lea itulau, na agai i ai suesuega ma saililiga a le Komiti Faapitoa lenei a le Palemene, na se i faatu ai le lafo i le aso 1 o Fepuari 2022, e uiga i Tulafono e 2.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

Ua maua i suesuega faalotoifale a le Ofisa o le Fono lava ia, ua fa ni lomiga eseese ua aliae mai i le Tulafono o Fanua ma Suafa 2020 ma le Tulafono o le Teuteuina o le Faavae 2020.

Itulau e 4, itulau e 5 ma le itulau e 6 o lo o taua ai, i le 1.1, 1.2, 2 ma le 3 ma le 3.1.2, o Taiala ia na faatino ai suesuega a le Komiti na afua ai le lafo. E faapitoa lenei ona o sui auai na aso na amataina ai taualumaga, o iloiloga i aso o uluai molimau ma le afuaga na laga ai lenei mataupu, o lo o taua uma i itulau na ou taua i luga.

Itulau 7 ma le 8, 4.1 o le Lipoti, o le toe faamanatu ai lava mai le Faavae o le Malo Tutoatasi o Samoa le pule a le Palemene e pei ona i ai i le Fuaiupu 42 le faamatalaina o le Palemene o Samoa e aofia ai le Ao o Le Malo ma le Fono Aoaofa Faitulafono lenei. E pei foi ona faamatalaina i le Fuaiupu 43 o le Faavae, o le Pule lava e fai ai Tulafono o lo o i le Palemene lava. 60, Tulafono Tau Faaofi ua i ai le maliega e avea ma Tulafono a le Palemene, o le Palemene lava ma le Fonousu o lo o i ai le malosiaga.

Itulau e 9 ma le 10 o le Lipoti, o lo o taua ai le Tulafono Tumau e 111, 112 ma le 113, ou te fia faitauina auiliili mo le faafofogaaga, e le gata o lenei Palemene, a o le faafofoga mai a so o se Samoa i lana ia lava faamasinoga i suesuega a lenei Komiti.

111. Teuteuga Aloaia

- (1) I le saunia ai o le Tulafono Tau Faaofi mo le Maliega a Le Ao o le Malo, e mafai e le Failautusi ona lomiga teuteuga tusitusia ma faasao ni sese tau Ofisa po o tau lomiga i so o se vaega o le Tulafono Tau Faaofi.
- (2) Ia faaalua manino uma ia teuteuga tusia ma faasaoga uma i le “Tusi Faamaonia o Teuteuga o le Tulafono Tau Faaofi”.

112. Ina ua uma ona Tuuina Atu ai le Maliega a le O Le Ao o le Malo:

E tatau i le Failautusi ina ua uma ona tuuina atu le maliega a le Ao o le Malo i se Tulafono Tau Faaofi, ona tuuina atu se tasi o lomiga faamaonia o le Tulafono Tau Faaofi i le Failautusi a le O Le Ao o le Malo, lona lua i le Loia Sili, lona tolu i le Resitara o le Faamasinoga Sili, lona fa i le Minisita e fitoitonu ma le Tulafono Tau Faaofi, ma le kopi mulimuli, ma taofia le lona lima o lomiga.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

113. Tulafono Tau Faaofi Fou ua Pasia e Avea ma Tulafono o le Palemene:

- (1) E leai se Tulafono Tau Faaofi o le a avea ma tulafono seiavagana ua tuuina atu i ai le maliega ma le faamaoniga a le O Le Ao o le Malo.

I le Tulafono lava lea e 113(2):

- (2) Afai e tuuina atu se Tulafono Tau Faaofi ua pasia e le Fono Aoao Faitulafono i le O Le Ao o le Malo mo lana Faamaoniga, o le a ia tautinoina, i luga o le fautuaga a le Palemia, lona faamaonia o le Tulafono Tau Faaofi po o lona teena foi e le tuuina atu i ai lana faamaoniga i le Tulafono Tau Faaofi.
- (3) O se Tulafono ua faamaonia e le O Le Ao o le Malo e pei ona aiaia nei o le a taua loa o se Tulafono Faavae a le Palemene ma o le a faamamaluina i le aso lava na faamaonia ai, po o so o se tasi lava aso (pe i tua atu po o luma mai o le aso na faamaonia ai) e pei ona faatinoina lenei tulaga i le Tulafono Faavae.
- (4) I le noatia ma le fai fuafua i le (5), e mafai e le O Le Ao o le Malo ona le faamaonia se Tulafono Tau Faaofi sa tuuina atu i ai le faamaoniga talu ai, lea e le o i ai tulaga sao atoatoa e pei ona pasia ai e le Maota, i luga o le fautuaga a le Failautusi. E ao i le Failautusi ona vave faamatuu ese le Tulafono Tau Faaofi ua le faamaonia, ma faagasolo le Tulafono Tau Faaofi moni na pasia e le Maota mo lana faamaoniga.
- (5) O se tulaga e le faamaonia ai o i le (4) e ao ona tausisia ai itu nei:
- (a) e ao ona tulai mai i totonu o le masina e tasi mai le aso na faamaonia ai;
- (b) e ao i le Failautusi ona saunia ma sainia se Tusi Faamaonia o Teuteuga e faailoa ai le vaega e le sao atoatoa o manaomia ai le le faamaonia o le Tulafono Tau Faaofi, e tutusa ma le Tusi Faamaonia o Teuteuga o le Tulafono Tumau 111; ma

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faataatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

(c) e ao i le Failautusi ona sainia se folafolaga e faapea o se tulaga le sao atoatoa sa faapea ona le i faamoemoeina, ma e leai ni tulaga faaupufai, tamaoaiga po o so o se isi faiga e ese ai, faiga faatosina e aafia ai i le fautuaga e le faamaonia ai.

Lau Afioga i le Fofoga Fetalai, e taua Tulafono Tumau ona e fia oo i ai se leo a o faagasolo le Lipoti.

4.2 ma le 4.3 itulau 11 o lo o toe faamatala atili ai le tautinoga a le Ofisa o le Fono Aoa o le latou suesuega faalotoifale lava latou sese po o lape tau le ofisa, faatamala le ofisa, le mulimulitaia faagasologa o taiala o galuega, ua faamaonia mai e le tasi se lomiga.

Itulau 12 ma le 13 ma le 14 o le Lipoti o lo o taua ai se gaoioiga sa tatau oan fai e le Failautusi o le Fono pe a tulai mai ni sese i Tulafono ua maea ona pasia e le Maota. Faatasi ai ma se molimau a se tasi o Faauluuluga a le Vaega o Komiti Faa-Palemene, e ta ane lava le 6 o le taeao o le aso 15 o Tesema 2020 na pasia ai Tulafono e lua ua faatu ai le lafo o tau fai teuteuga a le Komiti, ma faasalalau nei Tulafono i le atunuu. O itulau foi nei ua amata ona taua e i latou sa amatamea i le fesuiaiga o Tulafono ua pasia, itulau 15 seia oo i le itulau 22, o lo o faamatala auiliili atu ai i le Lipoti le aso na pasia ai Tulafono nei e lua, aso 5 o Ianuari 2021, ua afaina ma ua masofasofa ma tua mai nei ina ua pasia nei Tulafono ma aafiaga ogaoga na tulai mai ai.

Ou te fia tauina aso taitasi ma mea na tutupu ai ina ia matua manino lenei Palemene ma le faafofogaaga a Samoa o tapuai mai. Itulau 23, 24, 25 ma le 26, o lo o faamatala auiliili atu ai le Lipoti, auala faatogafiti leaga sa faatinoina e momoli ai nei Tulafono i le saina a Le Ao o le Malo, ma ou te fia faamalalama atili le auala na faatogafiti ai nei faiga i le aso 5 o Ianuari 2021.

I le tuina atu o se Tulafono Tau Faaofi e avea ma Tulafono a le Palemene i aao o Le Ao o le Malo, e saunia e le Ofisa o le Fono i le Failautusi o le Fono le Certificate e tau o le Certificate of Amendment po o le Tusi Faamaonia o Teuteuga o Tulafono, na maea ona pasia e le Maota lenei. O totonu o lea Certificate of Amendment po o le Tusi Faamaonia, o lo o lolomi uma ai vaega o le Tulafono ua pasia e le Maota. E ese la le faavaa lea e fai si malo o le pepa, lona quality, e tulaga ese. O lo o saina ai le Failautusi o le Fono Aoa, saina ai le Palemia po o le Taitai o le Malo, ia ma le saina a Le Ao Mamalu o le Malo.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

O lalo o le saina a Le Ao Mamalu o le Malo o lo o i ai le faamaufaaailoga a lo tatou atunuu, e faigata ona iloa e se fofoga o se isi se i vagana ua e feel ina pe e te tagofia le faamaufaaailoga a le Malo. Ae i le tuuina atu o nei Tulafono e pei ona faamatalaina i itulau nei sa i totonu o le Certificate of Amendment nei Tulafono nei e lua ua faatu ai le lafo.

Ma o Certificate of Amendment po o le Tusi Faamaonia o Teuteuga o le Tulafono, e matua le vasaga lava ma Tulafono e lua lea e taoto nei i totonu o le Certificate of Amendment lea, ese faamaumauga na maua e le Komiti o tusia i Tusi Faamaonia nei, ese faamaumauga o lo o i totonu o le tino atoa o Tulafono nei e lua.

O le mea lea na matauina e le Komiti ua le usitaia ai vaega aemaise o Tulafono Tumau na se i maea ona ou lauina atu, 111, 112 ma le 113.

Itulau 27, 28, 29, 30, 31 ma le 32, o lo o lipotia ai ni mau tuufofoga a nisi o molimau sa suesueina e le Komiti e pei o i latou ua taua i lalo. Faatonu o le Komisi o le Toefuataiga o Tulafono po o le Samoa Law Reform Commission, le sa avea ma Loia Sili, Former Attorney General, le sa avea ma Loia Sili Lagolago, Peresetene o le Faamasinoga o Fanua ma Suafa.

O nisi o nei molimau sa oo mai i luma o le Komiti Suesue Faapitoa leni, ma o matuaofaiva o le faatufugaga o le Tulafono i le vaavaai a le Komiti Suesue Faapitoa leni. O itulau ua taua i luga o le Lipoti leni, ua faamauina ai le tele o le taimi o le Komiti e fesiligia ma suesue atili ai molimau nei, ona o i tonu na mapuga mai ai le tele o fesuiaiga o Tulafono nei e lua ua mafua ai kopi eseese nei e fa o Tulafono nei.

Lau Afioga i le Fofoga Fetalai, ou te fia faatepa le Maota Fono leni i se tasi o Teuteuga o le Tulafono, o le Teuteuga o le Faavae 2020 o lo o i totonu o le siata o Teuteuga a le Komiti sa faasavalua Tulafono nei i le atunuu, pe a ma le 8 i le 9 masina i le 2020.

I le siata o Teuteuga nei o le Komiti o le 2020, na tuuina atu ai i le Palemene i le aso 15 o Tesema 2020 ina ia pasia le Teuteuga o le Faavae 2020 o lo o i ai i totonu o le siata, o lo o faapipii atu i tua o le Lipoti, Table of Amendments. E fia teuteuina o le Faavae i lona vaega fou leni.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

Ou te fia avatua se vaega o le Teuteuina o le Faavae na pasia e le Maota lenei i le aso 15 o Tesema 2020 e avea ma ana Tulafono. Vaega 104E(4), e faitauina faapenei: “O le pule e tofia ai, aveesea ma faataatia tuutuuga o le tofiga o so o se Sui Peresetene, Peresetene Lagolago ma se Faamasino o le Faamasinoga 1 o Fanua ma Suafa, ua tuuina atu i Le Ao o le Malo, i le faia i luga o le fautuaga a le Komisi o le Faamasinoga o Fanua ma Suafa e pei ona mafai ona aiaia e se Tulafono.” O le vaega lava lea o le Tulafono o le Faavae na se i lauliliuina ma pasia i le aso 15, o lo o i ai foi le Vaega 5 e faapea: Vaega 104E(5), o lea lava Tulafono o le Teuteuga o le Faavae 2020, o lo o tusia i le siata o Teuteuga e faapea; (5) i lenei vaega ua taua e le Komisi, o lona uiga o le Komisi o le Faamasinoga o Fanua ma Suafa, e pei ona mafai ona aiaia e se Tulafono.

Lau Afioga i le Fofoga Fetalai, e toe faafoi se faamatalaga i Tulafono lava nei e lua na faatu ai le lafo, ma ua matauina e le Komiti e tusa ai o le molimau a le alii Ofisa o le Fono o lo o nafa ma le auunaga i le siakiina o Tulafono nei, o Tulafono nei e lua, na oo mai i luma o le Palemene i le aso 15 o Tesema 2020 mo le pasiaina, e na o le lomiga faa-Samoa na tuuina mai o Tulafono nei, na tuuina mai i le aso 15 i le Maota Fono lenei, ae le i tuuina mai ni lomiga i le faa-Peretania, seia vagana ai le aso 5 Ianuari 2021, sa tuuina atu ai lomiga uma nei e lua i le Gagana Samoa ma le Gagana faa-Peretania i Le Ao Mamalu o le Malo o Samoa mo le sainia.

Le mamalu o lenei Palemene, faafoi se tala i tua i le 104E(4)&(5) i le fasifuaiupu mulimuli lava lea o lo o valivaliina atu i le Lipoti i le lanu samasama o lo o i le parakalafa 4 ma le 5, fasifuaitau puupuu lava e faitauina faapea; *“e pei ona mafai ona aiaia e se Tulafono.”*

Lau Afioga i le Fofoga Fetalai, e oo le Teuteuga lenei o le Tulafono o le Faavae 2020 i le Tusi Faamaonia o le Teuteuga o le Tulafono po o le Certificate of Amendment i Le Ao o le Malo mo le sainia o Teuteuga e avea ai ma Tulafono, ua leai le fasifuaitau lenei, *“e pei ona mafai ona aiaia e se Tulafono.”*

Lau Afioga i le Fofoga Fetalai, ona tu lea o le fesili, o ai na suia, o anafea na sui ai, a o ai e na taupulepule e faatino? Se i ou molimau atu nei ma le Komiti i ni molimau sa fofogaina ai la latou mau tuufofoga i luma o le Komiti i le fasifuaitau lea ua le i ai i totonu o le Tulafono, ua aveesea mai le Tulafono ae na pasia e le Palemene.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

O le molimau a le Faatonu o le Komisi o le Toefuataiga o Tulafono e tusa ai o le mau tuufogoga na aumai, o le sa avea ma Loia Sili, le sa avea ma Loia Sili Lagolago ma le Peresetene o le Faamasinoga o Fanua ma Suafa, sa autasi le latou molimau mai i lea fasifuaia, *“e pei ona mafai ona aiaia e se Tulafono.”* Fai mai le latou mau na tuuina mai i luma o le Komiti ma ua faamauina foi i masini pueleo a le Komiti, o le aveesea ai o lea fasifuaia e ui ina pasia e le Palemene, e le oti ai le Tulafono, e le pau ai le Tulafono, e le pau pe le substance ai le Tulafono, ma e le noatia ai foi le Tulafono mai lona faatinoina.

Sa amata i le suesueina o le Komisi e Fuataiga Tulafono a le Malo. Sa fesiligia le Faauluuluga pe o le mea sa tatau ona i ai se Tulafono, ae maua foi i saililiga a le Komiti, o le Legislative Drafter lea o le Tulafono ma se i implement mai ai le Tulafono. O upu la ia sa amatamata mai ai ona fau le tino o le Tulafono, ae molimau mai i luma o le Komiti i upu ia pei ona ou taua e le pau ai se Tulafono. E faapena foi oan molimau mai isi foi itutino pei ona ou taua, e i ai le Former Attorney General, o le sa lagolagosua foi ia te ia, faatasi ai ma le Peresetene o le Faamasinoga o Fanua ma Suafa. Alu ai alu ai suesuega a lau Komiti, sa le faavaivai le Komiti, na se i asa lava se i tau sue le atoaga o lea foi fasifuaia o le Tulafono. O au lava leni o le Taitaifono na ou fesili mulimuli lava i le o lo o taitaia le Samoa Law Reform Commission, le Toefuataiga o Tulafono, pe faamata e tatau ona i ai se Tulafono fua ina taoto ia le fasi fuaiupu? A o le fasi fuaiupu sa tusi, momoli mai i le Palemene ma pasi, ae toe finau i luma o le Tulafono e le oti ia ai se Tulafono i luma o le Komiti. E le afaina lea.

E matau la le Komiti, pe ona mafua la i se a ona tusi? Ae tali mulimuli mai, o lo o i ai se isi vaega o tapenaina e tau o le Komisi o Tulafono Tau Faaofi o le Komisi o le Faamasinoga o Fanua ma Suafa ua maea ona tapena. A tou silasila le mamalu o le Maota sa ave lau tusi ina ia tuuina mai ni faamaoniga, na ua i o outou aao. Ua tuuina mai le faamaoniga ma o le process lena e fitoitonu i ai le Tulafono lea 104E(4) ma le (5). E tatau ona i ai se Tulafono ae o la sa tapena. O la sa tapena le Tulafono.

Le mamalu o le Palemene, Samoa ua faafogoga, fai lau moe Faamasinoga. Faaiuga ma le fesiligia pea o molimau nei, e tusa ma lo latou molimau. Fesiligia le Peresetene o Faamasinoga o Fanua ma Suafa, e le natia masalo ua outou tauaoina le faamaumauga o imeli na tuuina mai.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

Sa tuuina mai imeli i le Aso 17 o Tesema 2020, e afua mai i le tusi mai o le Peresetene o Fanua ma Suafa i le sa taitaiina le Ofisa o le Fono ina ia faatino ni fesuaiga i le Tulafono, ona faatino lea o fesuaiga i le Tulafono. Maea ona faatino fesuaiga o le Tulafono ona toe tusi mai foi lea o le Peresetene o Faamasinoga o Fanua ma Suafa i le aso 14 o Ianuari 2020, a ua maea ona pasia le Tulafono mo nisi suiga o le Tulafono ma Tulafono nei e 2. O lo o ua tuuina atu faamaumauga o imeli ma nei fetusiaiga.

O le mea e fia mautinoa, ma fia faamalamalama le mamalu o le Palemene, na maea loa ona sainia e le Ao Mamalu o Le Malo i le Aso 5 Tulafono, ma tuuina mai i tua Tulafono, ma ua mautinoa e le vasaga le mea na pasi e lenei Palemene ma faamaumauga na tuuina atu i le Ao o Le Malo i le Aso 5 o Ianuari. Maea le Aso 5 o Ianuari galulue le Ofisa o le Fono e tuuina i luga le uluai kopi mo upegatafailagi a le Palemene i le Aso 12 o Ianuari. Tuuina i luga ia kopi e le o sao atoatoa ma e le o atoatoa faamatalaga na pasi e le Palemene lenei.

O faamaumauga ia o le Aso 12 o Ianuari o lo o i ai ma faasaoga na anau atu ai le Peresetene o le Faamasinoga o Fanua ma Suafa i le Aso 17 o Tesema 2020. Maea ona tuuina i luga o le upegatafailagi i le Aso 12, ae toe tusi atu foi ma imeli atu le Peresetene o le Faamasinoga o Fanua ma Suafa i le Aso 14 i le Ofisa o le Fono ina ia faatinoina nisi tusitusiga ma nisi foi suiga i le Tulafono. Maea le Aso 14, toe suia foi le upegatafailagi i le Aso 15, ua i ai suiga ua faatinoina. Na se i sau ai lava seia oo i le Aso 4 o Fepuari 2021, ua i ai foi nisi suiga ua i ai.

Lau afioga i le Fofoga Fetalai, sa matua auiliili e le Komiti lenei, e le na o le pau lea o se vaega i fetusiaiga, na se i momoli mai ai le finagalo o le Peresetene o le Faamasinoga o Fanua ma Suafa. Ma ua faamauina e masini faaneionapo e faamauina ai faamatalaga, na matua afio atu lava ia le Peresetene o Fanua ma Suafa i le Ofisa o le Fono, ia ma faatino ai nisi o suiga ma se i anau ia le aufaigaluega ina ia faatino suiga nei.

Ia o au sa ou fesili i le Peresetene o le Faamasinoga o Fanua ma Suafa, sa ou fesili ai i se tulaga foi lea faapea, pe faamata e faapei i ona faatino ia galuega? A lea ua o matou mautinoa e i ai le tino o le Tulafono lea e taoto ia i matou ona ua oo mai ia le process lea. E faamalieina ai ia le 104E lea (4) ma le (5). O le tali na tuuina mai ia i matou, e le afaina lena, faasavali pea le Tulafono latou.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

A o le process lea ma le Tulafono Tau Faaofi lea e fufou mai, manatu lava i matou o le Komiti, talofa e la i le Tulafono sa faagasolo i le atunuu. Talofa i le Tulafono sa faasolo i le atunuu ma faatalanoaina, e le o atoa lona tino. Ia aua o lea faatoa taoto mai i le process, e atoa i ai tino o Vaatausili. O lea la ua o matou maua, 8 i le 9 masina tulou le gagana Samoa, na ave le atoa le Tulafono i le atunuu, aua o lea e le o i ai se vaega o le Tulafono ina se i tofia ai le Komisi o Faamasinoga e pei ona aiaia i se Tulafono.

Ma e le natia i suesuega a i matou o le Komiti leni o le vaega tonu lava lea e toalia ai, lea vaega o le Faigamalo ma lea tumuai o le atunuu e le Ofisa o Faamasinoga. O lea foi ua aliae mai i i, o lea ua maua e le suesuega loloto a le Komiti.

O faamatalaga ma fesiligia ai le Peresetene i imeli o aso taitasi nei, o lea ua faamauina ia lo outou finagalo, ma ua maea foi ona tuuina atu faamaumauga, aua le mamalu o lo outou silafia i ia vaega.

Lau afioga i le Fofoga Fetalai, e maofa le Komiti i molimau nei. E maofa le Komiti i le tuufaataasia o latou finagalo, a o le faamoemoe lea o le Palemene, e lilifa atu i ai ma faamoemoe le Palemene o latou e faufauina ma amatamata mai Tulafono. A o lea ua toe faasaga mai i le Komiti ma faapea mai e leai se afaina pe a leai upu na na o matou tapenaina.

E toe fia faatepa le Palemene leni i le tuanai i luga o upegatafailagi, o le a lona aafiaga e pei ona faatu le lafo i kopi nei e 4? Afai o le Aso 12 o Ianuari sa mau e ni aiga a o faafinauina ia ni latou meatotino, o i la na fua mai ai ni finau, fua i le kopi o le Aso 12. Ae afai foi o se aiga na o latou maua i luga o upegatafailagi le Aso 15 lea, lea foi ua toe suia ona o le anau atu i le Aso 14 o le Peresetene o Faamasinoga o Fanua ma Suafa, ese foi le auala e fua i ai ia le latou finau. Afai foi o le Aso 4 o Fepuari na maua ai aua o nei vaitaimi tele le malosiaga o upegatafailagi, fua foi la i ai le finau a aiga i latou meatotino o fanua ma suafa, ese foi le auala ua fua i ai ia le latou finau. Ma ou te tautino atu, ua matua masofasofa Tulafono nei.

Ua le iloa e le atunuu pe o fea le sao. E pei lava ona o matou fai atu, o le atoaga lena. E tele mea na maua e le Komiti Suesue peitai ua o matou oto atu, na o ni vaega taua lava. E le gata ona o matou toe tuufesili, pe tataua ea ona o tatou faasagatonu le mea sa i ai i siata o teuteuga? Pe gata ai i i le galuega a le Komiti? O lea ua o matou matau i suiga na anau atu, fai mai le talitonuga a nisi tagata molimau ma i latou na faatino, ua na o ni sese faale-Ofisa. Ia po o ni typographical errors.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

Ae sa matou le nofoai. Sa o matou saili lava pe mafua i se a le anau lea? O se tagata po o ni tagata ina ia suia, aumai i fafo ia lea faaupuga, tuu atu i totonu lea faaupuga. Po o le a le intention? Ae o ai e manuia ai i ia suiga?

Samoa ma lau faafogafoga mai ma le mamalu o le Palemene talofa, e tatou te maua pea le faaupuga lea i aiga pe a soalaupule, aua ne i pule mai i tua aiga. Ae o le fesili a i matou nei le Komiti, o ai lea ua fia niuali? O ai lea ua fia niuali i le Palemene? Fea le Palemene? Le afioga i le Tamaitai Palemia ma lana Kapeneta filifilia lea. Minisita Lagolago lea. Lau afioga i le Sui Taitai o le Itu Agai ma le mamalu o sui usufono mamalu uma o le Maota.

O ai lea ua toli niu fitifiti i Tulafono? O ai lea ua fia tiatamusa i Tulafono a le Palemene? Tulou o le upu e to ia te au faafoi mai se sese o faamatalaga a le Taitaifono. Ese mai i le Afioga Paia a le Atua e aoao ma aoai ai i tatou, ia o Tulafono Tumau o le Maota ma le Faavae o le Malo o Samoa, o Tusi Paia ia e taitaiina ai i tatou. E limataitaiina ai anoliu tausia o le atunuu. Ae o le a le mea lea ua o tatou maua?

O le mea lea na maua e le Komiti. E fia fai lava se faataitaiga pe faapei ona loloto ia le suesuega a le Komiti. Pe tau ina o matou tuu atu mea na aveesea se i faamalie ia le table of amendments? Ua leai lava.

E i ai le fesili na ou fesiligia ai faapea ia le Peresetene o Fanua ma Suafa, ona na i fale le matega i le Komiti. Pe faapei i ona faatino i tua mai? O le le faatinoina mausali o le Tulafono Tumau 111, 112 ma le 113. Ma ua mautinoa e le Komiti na taumuaalo ia le Ofisa o le Fono i le faatinoina. Aua o lo o taua i i, a i ai ni sese faalomiga, 30 aso e toe faamatuu mai ai le Tulafono ma toe tapena lea o se isi tusi faamaonia fou, New Certificate of Amendment se i faasao le Tulafono.

E leai se isi e sao i luma o le Atua, tuu mai ma le avanoa ma le umi, tasi le masina mai le aso na saina ai e le Ao mamalu o le Malo po o le 30 aso. Ua maua i suesuega a le Komiti, e le i faatinoina ia le process lea.

O au na ou fesiligia le Peresetene o le Faamasinoga o Fanua ma Suafa, afai ana faataunuu ia le process lea ma faamalieina Tulafono Tumau, o le a sou finagalo, a faapea ne i te i ua toe faafou le tusi lea faamaonia o le Tulafono mo se faataitaiga ae saina i le Aso 29 o Ianuari, lea o lo o i totonu o le vailiu o le 30 aso, toe tapena lelei, saina ai lea? O le a sou finagalo? Transaction date.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faataatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

O le tali na tuuina mai, e le Peresetene o le Faamasinoga o Fanua ma Suafa, e le o i totonu o se faamaumauga o se Tulafono Tumau. E le o i totonu o se faamaumauga o se Tulafono Tumau. Le mamalu o le Palemene ma Samoa ua faafofoga, 30 aso, 30 aso. Ia ona o matou maua loa lea lea la, se o le togafiti le mea lea. O le togafiti le mea lea, e atilililo. O lea e taumafai e faaoga le saina a le Ao mamalu o le Malo i le Aso 5 ae faaoga pea suiga ia i tua.

O ai ua fiu niuali i le Palemene lenei? Ua sili lona iloa i le Palemene mamalu e fauina Tulafono o le Malo? Ia o lena, o le loloto lena o le suesuega a le Komiti lenei. Ma ou te toe fia faatepa foi i nisi o faataitaiga ma se i o matou mautinoa lava, pe mafua e a ona anau e tuu le fasi fuaiupu lea i le isi faatausiuga o le isi Tulafono o Fanua ma Suafa e pei ona i ai le Fuaiupu 40(4). Ua maea lava le Tulafono na pasia e le Maota lenei, ae toe faapipii lava le fasi fuaiupu lea i ai, ma ave e saina le Ao o le Malo, seivagana se faatagaga a le Peresetene.

E mafua mai ia le fasi fuaiupu lea o le vaega e 40(4) pe a faapea e te taumafai e faaulu lau apili i le Faamasinoga i sau mataupu. A faaulu la lau apili i le Faamasinoga ia ui atu i le Lesitala, ae oo atu ua maea ia le taimi faatulagaina, pe e te oo atu foi e le i oo i le taimi faatulagaina, ae o le a faataua la le maea o le taimi faatulagaina.

Afai o le vaiaso na tea nei sa tataua ona ave ai lau apili lea, ui atu i le Lesitala, ia fai mai la o le fasi fuaiupu lea, e mafai ona tatala, tainane o le Tulafono ua maea lou taimi faatulagaina. Ae fai mai le fasi fuaiupu ma lona malosiaga, seivagana le faatagaga a le Peresetene o le Faamasinoga o Fanua ma Suafa. E pei e subject le mea lea i le faaiuga discretion a le Peresetene. E mafai la ona matou iloilo ina ma matou sue oo i le loloto, afai e mafai ona faataga le aso e 1 pe 2 i ni aiga e faaulu ai ia ni latou apili ae ua maea ia le taimi faatulafono a le Tulafono, o le fesili la, faamata la e le mafai e isi aiga ua 100 tausaga aua ua uma foi ia latou time frame ma time limit? Faamata la e le mafai foi la ona toe omai ia aiga ia ua 100 tausaga, leaga e tutusa lava le maea o le taimi faatulaga i le tasi le aso pe o le 2 aso ma le 100 tausaga?

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

O itu ia na oo i ai le Komiti ma lana vaiiliga. O le a le intention e manao ai le tagata e sui? Sui pe aveesea mea nei? Ia tasi lena vaega na oo i ai le Komiti lau afioga i le Fofoga Fetalai. O le isi fuaiupu na oo i ai le suesuega a le Komiti o le Fuaiupu 37(3), Tulafono lava nei o Fanua ma Suafa. Ua matauina ai e le Komiti le aveesea o Tulafono sa tuuina i le Ao o le Malo mo le sainia. Ia o le Fuaiupu 37(3) ua aveesea. Ae sa tatau ona tuu i ai se i sainsi le Ao o le Malo a ua pasi e le Palemene mamalu lenei. E faitauina ia le Fuaiupu 37(3) e faapea, i sauniuniga mo le fofogaina o se mataupu i lalo o lenei Fuaiupu, e mafai e le Lesitala ona aofia ai ni ata faamaonia o le faaaliga faavae na tuuina atu ia te ia i lalo o le Fuaiupu 5a (iii), o le Tulafono o Fono a Nuu 1990 ae na toe teuteuina i le Tulafono 2017.

Ua aveesea le faaupuga lea, sa lauliliu e le Palemene ma ioeina. Ia ona o matou tilotilo foi lea. Manaia ia o le fasi fuaiupu lea sa aveesea, si fasi fuaiupu ina ia silafia e tagatanuu o Samoa aemaise le tausia o Fono a Nuu, ina ia usitaia faiga faavae. O le fasi fuaiupu lea, e mafai ona momoli mai ai faiga faavae ma Tulafono a nuu i le Ofisa o Faamasinoga o Fanua ma Suafa ona faamauina lea o latou faiga faavae.

Ae o lea na anau se toatasi se tagata po o ni tagata ina ia aveesea. E mafua i se a? E faafefea la ona malamalama ia lo tatou atunuu o alafua ia e savali ai au i totonu o nuu ma vaega ia? E tasi ia o vaega sa matua taoto ai le lauliliu o au nei ma le Komiti, po o le a lava le mafuaaga e anau ai? Se i tau ina aveese pe tuu i ai i totonu.

O isi faataitaiga lau afioga i le Fofoga Fetalai, e pei lava ona ou fai atu, tele suiga ua maea ona tuuina atu i totonu o lipoti. Ma e fia faamatala lava ma le agaga lava faanoanoa, talofa e i lo tatou atunuu, 60 tausaga tutoatasi lou Malo. A o lea ua faamauina i talafaasolopito, ua le malu le Palemene i se tagata po o ni tagata. O se tagata ua finagalo e le savali i luma o le Tulafono, se i suesue le Tulafono. A ua finagalo e toso mai ia le Tulafono i ona luma.

Lau afioga i le Fofoga Fetalai, ona matou manatu lava lea, ua matua matou matauina, talofa e i le Palemene, matauina le tumatie o le Palemene o Samoa. Parliament Sovereignty and Supremacy of Parliament talu ai se tagata. Ia ona matou oo mai lea e pei ona fai atu lau Afioga i le Fofoga Fetalai, ona matou taunuu ai lea i le faaiuga autu ua o matou fautuaina ai lenei Palemene mamalu.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

Ua o matou taoto ai i se faaiuga autu e faapea, ua o matou matauina, ua solia vaega o le Tulafono, e pei ona i ai le Tulafono e 9.5 o Tulafono o Fetuunaiga ma Lomiga Faasalalau o Tulafono 2008, ma le Tulafono Tumau 186(d) ma le (e), o lea e fautuaina ai le Palemene, ma ua tuuina atu ai ma le fautuaga a le Komiti Suesue Faapitoa lenei i le mamalu o le Palemene lenei e faapea.

O le aotelega o le galuega Komiti Suesue Faapitoa lenei, ua faaiugafonoina lana faaiuga ma ua fautuaina ai le Komiti ma le Fono Aoaio Faitulafono mamalu e faapea, ina ia aloaia ma faamaonia ia le lipoti a le Komiti Suesue Faapitoa lenei i lenei Palemene.

Muamua, ia vave faamatuu ese pe faasolomuli mai i tua, immediately dispose Tulafono nei e 2, ua aafia ona suiga ma ua faatino faasolitulafono e se tagata pe ni tagata, ae ua talitonu le Komiti e le o le atoaga lea o nei Tulafono sa pasia e le Palemene. Ua afua ai ona matua maua nei lomiga eseese e 4. O lea fautuaga ua faataatia atu ai e lenei Komiti Suesue Faapitoa a le Palemene, ua maea le galuega a le Komiti lava latou ia, ae ua taatia atu i le Kapeneta ma le Palemene e ou Tulafono e 2, ua talitonuina le matua faaletonu ma ua satia, i le agai atu i le Tulafono o solitulafono, ona o le Palemene lava ia e fausia, e suia, soloia ana ia lava Tulafono e aunoa aunoa lava ma se isi malosiaga, e ono atagia ai le le tumatie o le Palemene o Samoa. Parliament Sovereignty Supremacy of Parliament.

E fautuaina foi le toe silasila o le Palemene i le toe fuataiga o se Tulafono e aiaia ai ia le faagasologa o Tulafono o Samoa, po o le Legislation Act for Samoa. O le agaga lau Afioga i le Fofoga Fetala'i o le Komiti lenei, ina ia faamaoti ia sese tau ofisa ma sese tau lomiga, ma isi tulaga tau suiga e ono oo atu i ai se faiga i se suiga, i se tulaga ua soli ai se Tulafono.

Vaega e 3, mo so o se Tulafono ua tuuina atu faatasi ma le Tusi Faamaonia o Teuteuga mo le sainia e le Ao o le Malo, e fautuaina e le Komiti lenei ma le agaga faaaloalo, ina ia tuuina atu le maufaailoga a le Ao o le Malo i itu uma o le Tulafono e aafia ai le faavaa malo, po o le Tusi Faamaonia o Tulafono, Certificate of Amendment ma le tino o le Tulafono. O lea faiga e manatu le Komiti o le a le mafai ai e so o se tasi ona toe faia ni suiga, ma toe lomina nisi kopi o Tulafono e ese mai i le uluai lomiga aloaia.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

E mautinoa ma talitonu le Komiti Suesue leni le soloia ai i latou na faia le solia e latou na faia nei suiga i lo latou lava suia o Tulafono a le Palemene mamalu o Samoa, e aunoa ma le uia o Tulafono Tumau 113 ma ua atagia le matua solia o le Vaega 5 (v) o Tulafono ma le fetuunaiga o lomiga faasalalau o Tulafono 2008, faatasi ai ma le Tulafono Tumau 186 i lona (d) ma le (e).

O lea ua fautuaina ai le Palemene ia faasee atu leni mataupu i le Ofisa o le Loia Sili ma le Matagaluega o Leoleo mo moliaga talafeagai faasolitulafono mo i latou uma e aafia i leni mataupu.

Lau afioga i le Fofoga Fetalai, o le atoaga lena o le suesuega a leni Komiti Faapitoa e uiga i nei Tulafono. O le a lafo atu i le Palemene talia ma le faafetai au nei le Taitaifono ma le mamalu o le Komiti le faafesiligia ai e sui usufono mamalu o leni Palemene.

Manuia le Fonousu a Samoa, manuia lau afioga i le Fofoga Fetalai.

FOFOGA FETALAI: Ua faamalo faafetai lau Afioga i le Taitaifono mo le tolaulauina foi o la outou lipoti. E i ai foi le talitonuga, ia ua manino le faafofogaaga a lo tatou Maota. E tele foi avanoa na maua e sui usufono mamalu ia e silasila ai foi i le Lipoti a le Komiti.

E na o si vaega lava lea laitiiti lau Afioga i le Taitaifono leaga o lea na taua i lau folasaga, faapea e leai se Faa-peretania na tuuina atu i le Palemene lea na taua e lau afioga o le Tulafono Tau Faaofi. Po o le Tulafono Tau Faaofi po o le Lipoti a le Komiti Faapitoa lea e le i avea ia se Faa-peretania. Ina i manino pea mo tatou faamaumauga le tulaga lea leaga o lea na e saunoa i ai i le taimi ua sola i lau saunoaga.

Afioga Auuapaau Mulipola Aloitafua Mulipola: Ia lau afioga i le Fofoga Fetalai e tusa ai o le faafesili, o le mea lava ia ua mautinoa ma tusa ai foi ma le ua tapenaina ia vaega, ua na o le vaega faaSamoa o le Tulafono ia e lavea ai ma amendments ia na taua. A o le English version lava ia o le Tulafono, e le i aumaia i luma i totonu o le Maota leni e tagofia e le mamalu o le Maota leni.

Ma le faaaloalo lava faafetai.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

FOFOGA FETALAI: Ia faafetai. Ia ao le i faagasolo ia saunoaga i le Lipoti a le Komiti, ia ou te toe faamanatu atu i mamalu o sui usufono e fia saunoa ina ia usitaia ia aiaiga o tatou Tulafono Tumau mo taimi faatulagaina o a outou saunoaga. E na o le tai 15 minute e avanoa mo le saunoaga a le sui usufono mamalu.

Ia ma o le avanoa lenesi o le tatou Maota, mo se sui usufono e fia saunoa. Ia tulai mai lau afioga i le Sui Taitai, lau afioga Fonotoe.

Tofa Hon LAUOFO FONOTOE NUAFESILI PIERRE LAUOFO: Faafetai i lau afioga i le Fofoga Fetalai o le Maota, ia ae le i oo atu se matou upu e tusa ai ma le folasaga matagofie ma le maeaea i le afioga i le Taitaifono, e momoli atu le faafetai i lau afioga i le Tamaitai Palemia i le \$1,000 lea sa maua nei i le taimi o le tatou malologa. E pau lava lea e faamanatu atu e toalua sui usufono o si o matou itumalo leaga e tasi le ma siaki. O le la la ua i o i lou tuafafine ae o le siaki la e i luga lou igoa. Ia e leai la se mea ou te popole ai. Ae faafetai foi mo le fesoasoani i lea vaega ia au le faamoemoe o le aso a taeao i le sisiina o le fua o le tatou Malo, ma le faamanatuina o le 60 tausaga, malo faafetai.

Ia sa faalogologo lava foi ma le totoa i le folasaga matagofie a le afioga i le Taitaifono e tusa ai ma le lipoti ia lana saunoaga faaalualu. E ese ma le loloto maeaea o vaega uma lava e foliga mai e leai se vaipanoa e le i oo i ai ia le latou sailiiliga. Ua foliga mai foi ua pasi i tua mo mea o taiala i galuega sa faatonuina e le Palemene, ia ae ui i lea, o mea taua o mea aoga o lea ua maua atu ai foi ma isi mau tulaga foi ia ua aumai o si vaega ua faaletonu sa faatinoina.

Ia ae o lenesi lava galuega lau afioga i le Fofoga Fetalai ia o lea e matau o le Lipoti a le Komiti Suesue Faapitoa i luga o le Lipoti a le Ofisa o le Failautusi o le Fono, i le eseese o lomiga o Tulafono o Fanua ma Suafa ia faapea foi ia le Tulafono Faavae. Ia e pei la o i o lea e matau atu o le lipoti a le Susuga o le Failautusi o le Fono ma le Ofisa, e afua mai ai ia lenesi galuega tele sa faatino e le Komiti Suesue Faapitoa.

O le lipoti la a le Susuga i le Failautusi e pei ona faataoto i le Laulau-a-fono ma faamaonia i le Aso 18 o Ianuari i le tausaga lenesi, ia o lea foi o lo o afea ma taua i totonu o le Lipoti a le Komiti Suesue. O le Komiti Suesue e pei ona tofia i le Aso 1 o Fepuari 2022. Ia ona mafua ai lea o le lipoti lea e pei ona taoto nei.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

A o le Lipoti lava ia a le Susuga a le Failautusi o le Fono, lea e pei ona taua i nai itulau ia i le tau amataga mai o le lipoti a le Afioga i le Taitaifono ma lana Komiti, ia o lo o taua ai e le Susuga i le Failautusi ia le faatamala o le Ofisa i le faatinoga o latou tiute. O lea foi o lo o aumai ai ni vaega ua sopoloa le latou silasila e i ai la nai vaega ia ua le mafai ona tuu ua le atoatoa i totonu o Tulafono lea na pasia e saina ai Le Ao mamalu o le Malo.

Ia o lea la ua taunuu mai i le lipoti lenei, ia faafetai o lea foi e faamauina le ioega a le Susuga a le Failautusi i le latou foi faatamala i le Faulautusi talu ai ae le o le Susuga i le Failautusi lea e i ai nei. O lea foi sa molimau i luma o le Komiti ia i vaega foi sa faapena ona lape ai foi ia le faatinoga o le latou foi auaunaga. Ia e pei la o le matau na o i ai o lo o faamauina i le lipoti a le Susuga a le Failautusi faapea o le uluai sese lava o le le atoa ona tuuina i totonu. O nei ma e tuuaia lava ia le latou Ofisa. E pei o le vaega ia o lo o faamauina i totonu o le latou foi lipoti a le Komiti Suesue Faapitoa.

E le tele foi se lagona e fia faaalua i lenei lipoti ae o si fesili e i ai nai vaega laiti ia e fia malamalama ai ia lou sui usufono ona o vaega tau... lea e faataoto mai ai fautuaga. E pau la le mea e fia agai i ai ma ave i ai se faamamafa o se tautalaga, ia o le fautuaga lea muamua. A o isi uma fautuaga, e i ai le a foi nei o le tuu i ai o le faamaufaailoga a le Ao o le Malo i itulau uma, ia e 100% ia fautuaga na.

E pau lava lea o le fautuaga muamua lea e pei ona aumai, ia vave faamatuuese pe faasolomuli mai i tua Tulafono e 2 ua aafia ai suiga ua faatino faasolitulafono i tagata po o ni tagata. Ia ma taatia atu i le Kapeneta ma le Palemene. Aua e 2 lava mea sa ou tulituliloa i lau faalogo, o le mafuaaga ua tulai mai ai nei mau feeseeseaiga, mea ia e pei ona tulai mai i le Tulafono, ma le lua, o le a le fofo, o le a se fofo o le faafitauli ua tulai mai. O lea ua matau atu i le fautuaga, e faamatuuese pe faasolomuli. E sau se taimi ona toe saunoa faamalamalama lea o le Afioga i le Taitai Komiti, ona e fia malamalama atili i le uiga o le faasolomuli i tua le Tulafono. Ona o se upu e pei e fou i lau faalogo, ma ou te matauina e le o i totonu o le Tulafono Tumau o le Maota, ia le faaaogaina o lea upu. Aua o lea e manino ma malamalama tulaga masani o le Maota, a fai o le uiga o le faasolomuli, o le aveese pe faaleaogaina po o le a lava. O lea lava e i ai tulaga masani, i lalo o le Tulafono Tumau.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

E pei ona silafia e faau mai le Tulafono Tau Faaofi e teuteu ai ia tulafono ia, pe faataatia mai foi se Tulafono Tau Faaofi, e soloia ai ia Tulafono ia. Ona agai loa lea i se isi laasaga e i tua atu. Ae pei o le vaega tonu lea, e fia malamalama i ai lou sui usufono i le uiga o le faasolomuli, pe faapefea ona faatino, po o ai e faasolomuli, ae pe a faasolomuli la, ona faasolomuli lea i fea? O fea e faasolomuli i ai? Aua o lea e pei e le o faamatala mai i le uiga o le fautuaga, ia upu nei, aua o le gagana faa-Peretania lea foi sa taua e le Taitaifono, o lea e bracket ai le immediately dispose. E pei o lau faauigaina o le upu dispose o le faaleaogaina. E pei e eseese ma le faasolomuli uiga o upu. E pei o vaega ia e fia maua ai se malamalama atili, i le faatinoga o vaega ia.

O le tulaga e pei ona ou vaavaai atu i ai, e tatau ona i ai se fofu o le faafitauli. E faafetai o lea ua aumai e le Afioga i le taitaifono maeaea ia vaega esesese ma vaega laiti, ma tulaga i imeli na faapena ona felafuai ma tulaga uma, ua ese le matagofie o le taoto mai o lenei Lipoti ma ona vaega esesese e pei ona aumai. E pau lava le isi vaega lea ou te vaavaai atu i ai, ona o lea e aafia ai ma le Tulafono. Aua e 2 Tulafono e pei ona saunoa le Taitaifono. O le Tulafono o Fanua ma Suafa ma le Tulafono lea, Tulafono Faavae po le Constitution. E pei ona silafia a fai se teuteuga pe aveese pe soloia le Tulafono Faavae po o le Constitution, e manaomia le 2/3, aua po o le a se silasila a le Komiti i lea vaega e manaomia le 2/3 le ioega e i ai finagalo ma le ioega a le Maota, ona faapena lea ona pasia se Tulafono e soloia ai lea vaega, pe fai foi se teuteuga, aua e manaomia foi le 2/3 pe a faapea e fia faatino se teuteuga i lea vaega. I lau vaai e pei e foliga mai, e le o i ai se vaega o le Tulafono Tumau e faasolomuli ai Tulafono ia.

Atonu o se taimi, aua o lea foi ou te vaaia tu i le Lipoti e toalua sui ia e le o saina i le Lipoti, atonu foi e saunoa i se taimi, po o le a le mafuaaga ua le saina ai i laua, ae masalo ai se mafuaaga faapena. E lelei lea aumai pea i se taimi, po o le a le laua silasila i ai.

O lau la tau vaavaai atu i ai, o le a la le fofu? le fofu o lenei mataupu ua tulai mai? O le fofu lea sa ave i le tusi a le Loia Sili, lea na ave i le Ofisa o le Fono, faaoga le Standing Order po o le Tulafono Tumau a le Maota 113, ae peitai e pei ona saunoa manino foi le Taitaifono, sa tatau ona faatino i totonu o le 30 aso.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

E na o le tasi le masina e mafai ai ona faatino le tulaga lena, e taua o le de-assent ma le re-assent, o lona uiga e faaleaogaina le sainsi, ona avatu lea i totonu o teuteuga ia, ona toe sainsi laia ma faamaonia e Le Ao o le Malo.

E pei o le tulaga lena, o lau la tilotilo i ai o le fofoga faigofie o le mataupu lena, o le faaoga pea o le tulaga lena, i luga o se lafo a le Maota e toe teuteu ai le 113 pe faataatiaese, ae tuu i totonu na i teuteuga na e le i maua i totonu, na le atoa, ona toe sainsi lea o Le Ao o le Malo, e faamamalu ma faamaonia Tulafono ia, ona faaauau ai lea o le tatou galuega. E pei o le vaega lea i lau vaai, aua a fai o le faasolomuli o le toe soloia o Tulafono nei, o lona uiga e aumai Tulafono Tau Faaofi i totonu e soloia ai. Ae tuu atu loa i le Tulafono Faavae, o le mea lena e fua i finagalo o le Maota pe maua le 2/3. O lona uiga e tele se galuega e toe asa mai tua pe a fai e toe amata mai i tua. E faapena sou lagona i le mataupu ua tulai mai, o le teuteu o Tulafono Tumau o le Maota, faaofi i totonu ona toe faatino lea o le re-assent.

E pei o vaega ia lau Afioga i le Fofoga Fetalai, e pei ona ou fai atu, e le umi foi se manatu, e na o le pau lava lena o mea sa tulituliloa, o le mafuaaga ua tulai mai ai le faafitauli, ma le 2, o le a se tatou fofoga i ai. O lena ua avatu na i motugaafa na e fesoasoani ai i le tatou mataupu. Ia manuia le Fono.

FOFOGA FETALAI: Ia malo faafetai, malo saunoa i lau Afioga i le sui usufono mo Anoamaa 2, Hon Lauofo, ia faafetai mo lou sao. O lea foi ua faafofoga atu le Taitaifono ma le Maota i fautuaga e pei ona tuuina mai.

O lea ua matau atu ua fou mai le sa o le sui usufono mo Faasaleleaga 5. Lau Afioga Peseta.

Afioga PESETA VAIFOU TEVAGAENA (Faasaleleaga 5): E momoli atu le faafetai i lau Afioga i le Fofoga Fetalai, ua maua foi lena avanoa, e molimoli atu foi se manatu o lena itumalo e uiga foi i le Lipoti a le Komiti. Ma e i ai le manatu o lou nei sui usufono, o se taimi ona ou agai atu lea i le Lipoti a le Komiti. Ae momoli atu le faafetai i lau Afioga i le Taitaifono. E faafetai ua manino vaega uma e pei ona e saunoa i ai. Ma e fia fesiligia lava e lou nei sui usufono, ona o lea e matau atu, e manaia le faataatiaina mai e lau Afioga o le tapenaga a la outou Komiti.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

O lo o ua faafofoga lenei Maota, sa outou asiasi i lagī, vaē, e tele mea e foliga mai sa outou asiasi i le tapenaga o la outou Lipoti. O lea foi e faapea mai, e limataitaiina lava la outou Lipoti i le Tusi Paia. O lea la ou te fia fesili atu ai i lau afioga i le Taitaifono, ona o lea ua e agai i le tulaga lea. O e silasila ifo i le vaega 23 o le Tulafono Tumau?

Ou te manatua le Paeaiga lea na tea nei, na teuteuina ai i lalo o le Faavae le upu lea o le mamalu. O le mamalu lea e na o le Atua e i ai le mamalu. A o le pule a ai na toe tuu ai i totonu o le Tulafono Tumau le Tulafono lea? O le upu lea o le mamalu, na mafua ai ona tuu i totonu le Faavae i le Atua Samoa i totonu o le Faavae, ma aveese ai le mamalu mai le faalagiga o Le Ao o le Malo. A o lea ua ou vaai atu nei i le 2021, o lea ua aumai le faafouina o le Tulafono Tumau, ua faapea mai, ua taugamalie, e foliga mai e faaaoga i sui usufono i totonu o le Maota, ae le o fafo atu o le Maota. O lea la o le a tatou agai i tulaga i pili nei e 3, ae faapefea le Tulafono a le Atua lea ua tatou solia? Ua uma ona fai mai le Atua o au o le Atua, o lou igoa lenei, ou te le avatua lou mamalu i se tasi, ou te le avatua foi lou viiga i se tupua ua ta. A o le a le mea ua toe aumai i totonu o le Tulafono Tumau? O le ala lea lau Afioga i le Fofoga Fetalai, ou te fia avatu lau talosaga ma le agaga mauualalo, toe silasila ina ia aveese le vaega lea o le Tulafono Tumau, e pei o tulaga ia, o lea ua aumai le tulaga lea tau le Tulafono, ona o lea e tau tutusa lava ma le tulaga lea ua aumai nei i totonu o le teuteuga o le Faavae.

FOFOGA FETALAI: E faamalie atu lava i le sui usufono mamalu, o le Tulafono Tumau fia lea e te talanoa mai ai? O le Tulafono fia lea e te saunoa mai ai?

Afioga PESETA VAIFOU TEVAGAENA: O lea ou te talanoa atu i le vaega 23 o le Tulafono Tumau, po o le itulau 57 o le Tulafono Tumau. O le agaga lea lau afioga i le Fofoga Fetalai...

FOFOGA FETALAI: Ia fai mai sau malologa se i tuu atu lava i le Minisita, e pei ua tau ese le lalolagi lea ua tatou oo i ai i le saunoaga a le sui usufono mamalu. Saunoa mai lau afioga i le Minisita o Galuega.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

Tofa Hon Olo Fiti Afoa Vaai (Minisita mo Galuega, Felauaiga ma Atinae Eseese): O se mea lava e fia faamalamalama lau afioga i le Fofoga Fetalai, i le saunoaga a le sui mamalu. O le mea foi lena o lea sa ou tau tulai atu ai, ua ou fiu e faitau le 23, e le o i ai se tulaga e pei ona saunoa i ai le sui usufono mamalu. I le matau atu lau afioga ma le paia o le Maota, e pei o lea e sai le afioga i le sui usufono, i le upu lea mamalu, ma le teuteuga o le Tulafono Tumau. Ou te manatua le taimi sa o matou tuua ai le Palemene, matou uma ia e toafa sa i ai, ae matou agai atu i le matou roadshow, o le taimi tonu lava lena, sa aumai ai suiga ia, o lea sa toe teuteu uma ai le tatou Tulafono Tumau. Ua ou le iloa la pe o ai a e sai i ai, ae sa e saofai ai i totonu ma e ioe uma i mea ia. Ua matua foi lou soifua ua tau galo mea faapena. Ou te iloa o lena e te manatua, ia sai atu i o, ae aua e te sai mai i i le Taitaifono, o lea faatoa taunuu mai lona sa i le Paeaiga lena. Ma le faaaloalo.

FOFOGA FETALAI: O le ala foi lena, o lea e tau tulimatai atu le saunoaga a le sui usufono, ona o lea ua taua ia tulaga uma. A o le vaavaai i ai a le Nofoa, e matua le feaiaai lava ma le saunoaga a le Taitai Komiti. E pei o le mea lena e faamalulu atu ai, ona o lea foi ua saunoa le Afioaga i le Minisita, ne i... faafaigofie mai a tatou saunoaga, ma tatou o tonu i le tulaga o lo o i ai le tatou... Ia tulai mai le afioga i le Minisita o Faatoaga.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Ioe e fesoasoani atu lava i le pitolaau a lau afioga, e lagona foi o lea e tau apaapa ona o le tatou taimi. Ae pei e matau i le sui usufono pei e faasuaava ea le sui usufono. Se se i siaki ifo le Satini o le Maota, e sala ese lava le mea lea e saunoa i ai ma le tatou Mataupu. O lea ua talanoa i le mataupu o le mamalu i lalo o le Tulafono Tumau, ae le o le mea lena o lea na avatu ai le Lipoti a le afioga i le Taitaifono. O si au faasilasilaga lena ma le faaaloalo.

FOFOGA FETALAI: Ou te talitonu o oe o se tasi o sui usufono matua o le Maota. E leaga o lea e matau atu, e pei ua taua le ...o le faa-Peretania o le Honorable, o lea e tau faafesili le mafaufau o le Nofoa po o gafea e agai i ai. Ae malie ia, faaauau mai lau saunoaga agai i totonu o le tatou Lipoti ma le agaga faaaloalo lau Afioaga i le sui usufono mamalu.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

Afioga PESETA VAIFOU TEVAGAENA: Lau Afioga i le Fofoga Fetalai, e i ai le taua e ala ai ona avatua le tulaga lea. Aua a fai foi o lea ua fai le sailiiliga i le tulaga lea ua faapea mai le Lipoti, e uiga i pili ia e 3. E leai lava se eseese i le tulaga lena ma le mea lea ua i ai le Tulafono lea sa pasi i le Paeaiga lea na tea nei, ma aveese ai le upu lea o le mamalu, ua le toe faaaogaina e so o se tasi lava. A fai ua fai mai le Atua ua na o ia e ou le mamalu, o lena...

FOFOGA FETALAI: Ia se i tulai mai le Taitaifono, leaga o lea ua pei ua agai mai i ai le saunoaga a le sui usufono mamalu.

Afioga Auuapaau Mulipola Aloitafula Mulipola: E leai se manatu e faalavelave i le mamalu a le sui usufono o lo o sausaunoa nei. O lea foi ua ou fiu e vaai i totonu o le Lipoti a le Komiti le 23 o le Tulafono Tumau, e pei e ese lava le lalolagi, tulou le Maota. Ae faamalulu atu foi i le Afioga i le sui usufono o lo o saunoa, e leai e na o le 2 Tulafono lea na faatu ai le lafo e le tolu. Ma le agaga faafetai.

FOFOGA FETALAI: E manatu lava le sui usufono mamalu, agai maia le saunoaga e tusa ai o le Lipoti a le Komiti.

Afioga PESETA VAIFOU TEVAGAENA: Ua lelei, o le a see ese la ma le tulaga lea, a o lea lava e manino i totonu o le Tulafono Tumau lea. Aua a fai o le agaga o le Lipoti lea ua aumai, e foliga mai o ni mea ua faaopoopo i lalo o pili ia e 3 pe o ni mea foi ua aveese, e le i pasia i totonu o le Maota lena, e leai lava se eseese ma le mea lea ua fai i totonu o le Tulafono Tumau lea. E leaga ua uma ona fai i ai le iuga a le Palemene, e le toe faaaogaina le upu mamalu i totonu o le Maota lena. Ae o le a le mea ua aumai i i, e faaoga i totonu o le Maota ae le faaaogaina i fafo. O le a le eseese o le mea lea tatou te tauanauina ai le faiga o le mea lea ma le mea lea mai i. O le mea tau le Atua lea ou te talanoa atu ai.

FOFOGA FETALAI: Ia onosai mai le sui usufono, tulai mai lau Afioga i le Tamaitai Palemia.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

Afioga Hon Fiamē Naomi Mataafa: O lea lava e tau matau atu po o fea le mea e tatai i ai le finagalo o le sui usufono mamalu. Ina ia tatou o tutusa uma i tatou pepa, o lea ou te tilotilo au i lau Tulafono Tumau o le 23. O le 23 o Nofoa o sui usufono lea e i ai i i lau Tulafono Tumau, faamolemole i te i ua eseese ia pepa ia tatou te galulue ai.

Afioga PESETA VAIFOU TEVAGAENA: Ia silasila ane i le itulau e 57 o le vaega 2. O lea la ua ou tauina atu le itulau, o lea ua faaopoopo atu le itulau. A o le 23, silasila i le (iv).

Afioga Hon Fiamē Naomi Mataafa: Faamolemole lau susuga i le Failautusi, se i susu lava po o le a le...o au lea e uu atu le Tulafono Tumau. O le mataupu 23, Nofoa o sui usufono.

Afioga PESETA VAIFOU TEVAGAENA: O le vaega 23 lena o le Tulafono Tumau. Lau Afioga, o le a faauma atu ia lau mataupu leaga laa uma ai lou taimi.

FOFOGA FETALAI: Lau Afioga i le Palemia.

Afioga Hon Fiamē Naomi Mataafa: Lau Afioga i le Fofoga Fetalai, e ese le taua o le tatou tulituliloa o auga ma faamoemoega o mataupu ua i luma o le Maota, e le faapea la e taomia le mataupu o lo o laga mai e le sui usufono, ae o le talosaga, e pei e lelei lava le tatai mai o outou finagalo. O lea lava ua manino mai le talosaga a le sui Taitai, i ala tatou te o ai. O suiga ia na fai, o lea ua saunoa atu le Minisita, o ai na faia suiga? Na fai e le Nofoaiga lea talu ai, lea e i ai le pepa lea e te aumaia. Ou te le iloa la po o le a le taua o le mataupu lea e te aumaia, aua o le mataupu a le Komiti, muamua, e le iloa, po o fea le Tulafono e sao. O le mea lena o lea tau tuliloa. O fea tonu le Tulafono na pasia iinei i le Maota. E fia malamalama po o le a tonu le Tulafono na saina ai Le Ao o le Malo. O le mea lena na ave i le Komiti latou te faia, o lea la ua tau atagia mai e i ai suiga na fai, e i ai tagata na faia, fai mai isi o lape o le faatamala, ae o lea foi e fai mai le Komiti, fai ma le mautinoa. Faamolemole lau Afioga i le Fofoga Fetalai, ou te le iloa po o le a le aiga o le mataupu, aua e le i faia se suesuega i le mamalu lena e te saunoa mai ai.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

O le suesuega lea na fai, po o le a le sao o Tulafono nei, ua 4 lomiga eseese o lo o i ai. Ae i ai le ituaiga mea ia e masani ai le autaaalo tuai, e faaalu le vaaiga i le isi mea, ae taatia le mea e tatau ona ave i ai le tatou talanoaga. Ma le faaaloalo.

FOFOGA FETALAI: Ou te iloa o lea ua manino le faafofoga mai a le sui usufono mamalu. O lea foi e tau vaai le Nofoa i le vaega tonu lea e te saunoa i ai, o le honorable member, ua ou le maua po o le a le mafuaaga ua e le fiafia ai i ia mea, a o mea ua i totonu o tatou Tulafono Tumau i ia foi futia ua tuana'i. Ou te talitonu foi o lea ua saunoa manino le Palemia, ia tatou o tonu foi i le tatou mataupu o lo o talanoaina. O lea lava e tau faatusatusa atu ma mataitu e le Nofoa po o gafea tatou te agai i ai.

Ae i ai le manatu, leaga o lea ua lalata i le tatou taimi malolo, ou te iloa o le a tatou toe feiloai ona manino atili ai lea o lau mataupu e pei ona tuuina mai.

E talitonu ua tatou taunuu mai i le faaiuga o Taulumaga o lenei aso. E ui ina le i maea le galuega o lo o tagofia, e i ai le manatu ua tatau ona fai se tatou malologa, tatou sailiili malosi. E i ai foi le talitonuga, e tele nisi galuega o lenei aso o lo o faatali mai i le paia o le Kapeneta mo le faamautuina o le tapenaga o le faamanatuina o le 60 tausaga o le tatou saolotoga taeao. O le a le mafai foi ona faaauau a tatou Taulumaga a taeao ona o le faamoemoe o le tatou atunuu i le faamanatuina o le tatou Tutoatasi. Ia tatou tala soifua ia i le Aso Tofi, ina ia momoli atu ai soifua o le tatou Maota e faaauau ai le tatou galuega.

Ae i le alofaiva i lenei aso, e momoli atu le faafetai ma le faamalo a le Nofoa. E momoli le faafetai i lau Afioga i le Palemia ma le tatou Malo, mo le tapenaga sa feagai ai e ala i le Tala o le Tupe. O se tasi lenei o galuega tutoa a le Faigamalo i le va nonofo ai ma le Palemene, o le Tala o le Tupe. O lea ua faataatia i le Laulau-a-Fono, ma ua saunoa manino foi le Afioga i le Minisita o Tupe, ua faamalo faafetai. Ua faamalo saunoa i sui usufono mamalu, sa saunoa i le Lipoti a le Komiti Suesue Faapitoa, e ui e lei maea ae ese le taua o finagalo ua faaalua. Ua faamalo tapena.

E momoli atu foi lau faafetai, ona o le amanaia o se taumafai atu i le faatonufoalaina o tatou Taulumaga. A fai ua sala se gagana a le Fofoga Fetalai, ia alolofa ma faamagalalo. E potu lava le tautai, ae le atoa atu i le liu o le vaa. Ua faamalo usufono i lenei aso.

31 ME 2022

P.P.2022/2023 Nu.1, Lipoti a le Komiti Suesue Faapitoa a le Palemene i le P.P.2021/2022 Nu.36, Lipoti o le Taunuuga o le Suesuega e Faatatau i le Mataupu na laga e le Loia Sili e uiga i Teuteuga o le Faavae 2020 & Tulafono o Fanua ma Suafa 2020

O lau tapuaiga Samoa, i ou tulaga faalupelupeina faamalo fai o le faiva, malo le tapuai. Ua manuia le Fonotaga a lau Palemene i lenei aso, ona o lau tapuaiga malo faafetai.

E momoli atu foi le faafetai i Ofisa Sili o Pulega o Matagaluega, Faalapotopotoga Tumaoti a lo tatou Malo, faamalo le faamalolosi mai, mo le lagolagoina o galuega fai a lo tatou Maota. O outou lava e tua atu i ai le tofa a le Palemene, malo onosai.

E faafetai i auunaga eseese uma o lo o tautuaina le Palemene i aso fono taitasi, faamanuia le Atua i lo outou valaauina.

A tuuama le fua ma afifio atu le paia o le Palemene i lenei aso, ia agalelei le Atua ma momoli atu lo outou soifua i aiga o lo o faatali mai. O a foi nisi galuega o faatali mai, ia muaau ma muliau le Atua.

Ia talosia i le alofa o le Atua le faamoemoe o si o tatou atunuu a taeao i sauniga uma a le atunuu i ona tafa e fia aemaise o Tiafau nei, mo le faamanatuina o le tatou Malo Tutoatasi, ia i ai le agalelei o le Atua. Ia o tatou tau fai lagona, le loto faafetai i lea aso, ona o le aao faaloaloa o le Atua, ua tau manuia ai le folauga a Samoa. Ia manuia le faamanatuina o lou Malo Tutoatasi Samoa a taeao.

Ae tatou te le i tolopo, ou te talosaga atu i le sui usufono tamaitai mo Aleipata Itupa i Lalo e te saunia se tatou tatalo e faaiu ai le tatou Fonotaga.

Na tolopo Taualumaga a le Fono Aoaofaitulafono i le itula e 1:00 i le aoauli, seia aulia le Aso Tofi, 02 Iuni 2022 i le itula e 9:00 i le taeao.